

नमो नमो निम्मलदंसणस्स

पू. आनंद-क्षमा-ललित-सुशील-सुधर्मसागरगुरुभ्यो नमः

७

उवासगदसाओ-सत्तमं अंगसुत्तं

मुनि दीपरत्नसागर

Date : / / 2012

Jain Aagam Online Series-7

कमंको	अज्झयणं	सुत्तं	गाहा	अणुककमो	पिट्ठंको
१	आनंद	१-१७	१-	१-१९	०२
२	कामदेव	१८-२६	-	२०-२८	१०
३	चुलणी पित्ता	२७-२९	-	२९-३१	१५
४	सुरादेव	३०-३१		३२-३३	१७
५	चुल्लसय	३२-३४	-	३५-३६	१८
६	कुंडकोलिअ	३५-३८	-	३७-४०	१९
७	सद्दालपुत्त	३९-४५	-	४१-४७	२०
८	महासत्तय	४६-५४	-	४८-५६	२६
९	नंदिनीपिया	५५-५५	-	५७-	३०
१०	लेइयापिता	५६-७२	२-१३	५८-७३	३०

७

उवासगदसाओ-सत्तमं

[पढमं अज्झयणं-आणंदे]

[१] तेणं कालेण तेणं समएणं चंपा नामं नयरी होत्था-वण्णओ पुण्णभद्वे चेइए-वण्णओ ।

[२] तेणं कालेणं तेणं समएणं अज्जसुहम्मं समोसरिए जाव जंबू पज्जुवासमाणं एवं वयासी- जइ णं भंते! समणेणं भगवया महावीरेणं जाव संपत्तेणं छट्ठस्स अंगस्स नायधम्मकहाणं अयमद्वे पन्नत्ते, सत्तमस्स णं भंते! अंगस्स उवासगदसाणं समणेणं भगवया महावीरेणं जाव संपत्तेणं के अद्वे पन्नत्ते? एवं खलु जंबू! समणेणं जाव संपत्तेणं सत्तमस्स अंगस्स उवासगदसाणं दस अज्झयणा पन्नत्ता तं जहा-

[३] आणंदे कामदेवे य गाहावतिचुलणीपिता ।
सुरादेवे चुल्लसयए गाहावइकुंडकोलिए ।
सद्दालपुत्ते महासतए नंदिणीपिया लेइयापिता ॥

[४] जइ णं भंते समणेणं जाव संपत्तेणं सत्तमस्स अंगस्स उवासगदसाणं दस अज्झयणा पन्नत्ता, पढमस्स णं भंते! समणेणं जाव संपत्तेणं के अद्वे पन्नत्ते?

[५] एवं खलु जंबू! तेणं कालेणं तेणं समएणं वाणियगामे नामं नयरे होत्था, वण्णओ, तस्स णं वाणियगामस्स नयरस्स बहिया उत्तरपुरत्थिमे दिसीभाए एत्थ णं दूइपलासए नामं चेइए, तत्थ णं वाणियगामे नयरे जियसत्तू राया होत्था, वण्णओ ।

तत्थ णं वाणियगामे नयरे आणंदे नामं गाहावई परिवसइ, अइडे जाव अपरिभूए, तस्स णं आनंदस्स गाहावइस्स चत्तारि हिरण्णकोडीओ निहाणपउत्ताओ चत्तारि हिरण्णकोडीओ वड्ढिपउत्ताओ चत्तारि हिरण्णकोडीओ पवित्थरपउत्ताओ चत्तारि वया दसगोसाहस्सिएणं वएणं होत्था ।

से णं आनंदे गाहावई बहूणं राईसर जाव सत्थवाहाणं बहूसु कज्जेसु य कारणेसु य कुडुंबेसु य मंतेसु य गुज्जेसु य रहस्सेसु य निच्छएसु य ववहारेसु य आपुच्छणिज्जे पडिपुच्छणिज्जे, सयस्स वि य णं कुडुंबस्स मेढी पमाणं आहारे आलंबणं चक्खू, मेढीभूए जाव सव्वकज्जवद्धावए यावि होत्था तस्स णं आनंदस्स गाहावइस्स सिवानंदा नाम भारिया होत्था-अहीण-जाव सुरूवा आनंदस्स गाहावइस्स इट्ठा आनंदेणं गाहावइणा सद्धिं अनुरत्ता अविरत्ता इट्ठे सद्ध-जाव पंचविहे माणुस्सए कामभोए पच्चणुभवमाणी विहरइ ।

तस्स णं वाणियगामस्स नयरस्स बहिया उत्तर-पुरत्थिमे दिसीभाए एत्थ णं कोल्लाए नामं सण्णिवेसे होत्था, रिद्धत्थिमे जाव पासादिए दरिसणिज्जे अभिरूवे पडिरूवे ।

तत्थ णं कोल्लाए सण्णिवेसे आनंदस्स गाहावइस्स बहवे मित्त-नाइ-नियग-सयण-संबंधि-परिजणे परिवसइ-अइडे जाव बहुजणस्स अपरिभूए ।

तेणं कालेणं तेणं समएणं समणे भगवं महावीरे जाव समोसरिए, परिसा निग्गया, कूणिए राया जहा तहा जियसत्तू निग्गच्छइ निग्गच्छित्ता जाव पज्जुवासइ ।

तए णं से आनंदे गाहावई इमीसे कहाए लद्धे समणे एवं खलु समणे जाव [वाणियगामस्स नयरस्स बहिया] जाव विहरइ, तं महप्फलं जाव गच्छामि णं जाव पज्जुवासामि, एवं सपेहेइ संपेहित्ता ण्हाए, जाव सुद्धप्पावेसाइं जाव अप्पमहग्घाभरणालंकिरीरे सयाओ गिहाओ पडिणिक्खमइ, पडिणिक्खमित्ता सकोरेंटमल्लदामेणं छत्तेणं धरिज्जमाणेणं मणुस्सवग्गुरापरिखित्ते पादविहारचारेणं वाणियगामं नयरं मज्झंमज्झेणं निग्गच्छइ निग्गच्छित्ता, जेणामेव दूइपलासए चेइए जेणेव समणे भगवं महावीरे तेणेव उगच्छइ उवागच्छित्ता तिक्खुत्तो आयाहिण-पयाहिणं करेइ करेत्ता वंदइ नमंसइ जाव पज्जुवासइ ।

[६] तए णं समणे भगवं महावीरे आनंदस्स गाहावइस्स तीसे य महइमहालियाए जाव धम्मं परिकहेइ, परिसा पडिगया, राया य गए ।

[७] तए णं से आणंदे गाहावई समणस्स भगवओ महावीरस्स अंतिए धम्मं सोच्चा निसम्मं हट्ठुत्तु- जाव एवं वयासी-

सद्धहामि णं भंते! निग्गंथं पावयणं पत्तियामि णं भंते! निग्गंथं पावयणं रोएमि णं भंते! निग्गंथं पावयणं अब्भुद्धेमि णं भंते! निग्गंथं पावयणं एवमेयं भंते! तहमेयं भंते! अवितहमेयं भंते! असंदिद्धमेयं भंते! इच्छियमेयं भंते! पडिच्छिमेयं भंते! इच्छिमपडिच्छियमेयं भंते! से जहेयं तुब्भे वदह त्ति कट्ठु जहा णं देवाणुप्पियाणं अंतिए बहवे राईसर-तलवर-माडंबिय-कोडुंबिय-इब्भ-सेट्ठि-सेणावइ-सत्थवा-हप्पभिइया मुंडे भवित्ता अगाराओ अणगारियं जाव पव्वइया नो खलु अहं तहा संचाएमि मुंडे भवित्ता जाव पव्वइत्तए, अहं णं देवाणुप्पियाणं अंतिए पंचाणुव्वइयं सत्तसिक्खावइयं दुवालसविहं गिहिधम्मं पडिवज्जिस्सामि, अहासुहं देवाणुप्पिया! मा पडिबंधं करेहि ।

[८] तए णं से आनंदे गाहावई समणस्स भगवओ महावीरस्स अंतिए तप्पढमयाए थूलयं पाणाइवायं पच्चक्खाइ जावज्जीवाए दुविहं तिविहेणं-न करेमि न कारवेमि मणसा वयसा कायसा ।

तयाणंतरं च णं थूलयं मुसावायं पच्चक्खाइ जावज्जीवाए दुविहं तिविहेणं न करेमि न कारवेमि मणसा वयसा कायसा ।

तयाणंतरं च णं थूलयं अदिन्नादाणं पच्चक्खाइ जावज्जीवाए दुविहं तिविहेणं- न करेमि न कारवेमि मणसा वयसा कायसा ।

तयाणंतरं च णं सदारसंतोसीए परिमाणं करेइ, नन्नत्थ एक्काए सिवानंदाए भारियाए अवसेसं सव्वं मेहुणविहिं पच्चक्खाइमणसा०

तयाणंतरं च णं इच्छाविहिपरिमाणं करेमाण हिरण्ण-सुवण्णविहिपरिमाणं करेइ, नन्नत्थ चउहिं हिरण्णकोडीहिं निहाणपउत्ताहिं चउहिं वड्ढिपउत्ताहिं चउहिं पवित्थरपउत्ताहिं, अवसेसं सव्वं हिरण्ण-सुवण्णविहिं पच्चक्खाइ ।

तयाणंतरं च णं चउप्पयविहिपरिमाणं करेइ, नन्नत्थ चउहिं वएहिं दसगोसहस्सिएणं वएणं, अवसेसं सव्वं चउप्पयविहिं पच्चक्खाइ ।

तयाणंतरं च णं खेत्त-वत्थुविहिपरिमाणं करेइ, नन्नत्थ पंचहिं हलसएहिं नियत्तणसतिएणं हलेणं, अवसेसं सव्वं खेत्त-वत्थुविहिं पच्चक्खाइ ।

तयाणंतरं च णं सगडविहिपरिमाणं करेइ, नन्नत्थ पंचहिं सगडसएहिं दिसायत्तिएहिं पंचहिं

सगसएहिं संवाहणिएहिं अवसेसं सव्वं सगडविहिं पच्चक्खाइ ।

तयाणंतरं च णं वाहणविहिपरिमाणं करेइ, नन्नत्थ चउहिं वाहणेहिं दिसायत्तिएहिं चउहिं वाहणेहिं संवाहणिएहिं, अवसेसं सव्वं वाहणविहिं पच्चक्खाइ ।

तयाणंतरं च णं उवभोग-परिभोगविहिं पच्चक्खायमाणे उल्लणियाविहिपरिमाणं करेइ, नन्नत्थ एगाए गंधकासाईए, अवसेसं सव्वं उल्लणियाविहिं पच्चक्खाइ ।

तयाणंतरं च णं दंतवणविहिपरिमाणं करेइ, नन्नत्थ एगेणं अल्ललट्ठीमहुएणं अवसेसं सव्वं दंतवणविहिं पच्चक्खाइ ।

तयाणंतरं च णं फलविहिपरिमाणं करेइ, नन्नत्थ एगेणं खीरामलएणं, अवसेसं सव्वं फलविहिं पच्चक्खाइ ।

तयाणंतरं च णं अब्भंगणविहि-परिमाणं करेइ, नन्नत्थ सयपागसहस्सपागेहिं तेल्लेहिं अवसेसं सव्वं अब्भंगणविहिं पच्चक्खाइ ।

तयाणंतरं च णं उव्वट्टणाविहिपरिमाणं करेइ, नन्नत्थ एगेणं सुरभिणा गंधट्टएणं अवसेसं सव्वं उव्वट्टणाविहिं पच्चक्खाइ ।

तयाणंतरं च णं मज्जणविहिपरिमाणं करेइ, नन्नत्थ अट्ठहिं उट्ठिएहिं उदगस्स घडएहिं, अवसेसं सव्वं मज्जणविहिं पच्चक्खाइ ।

तयाणंतरं च णं वत्थविहिपरिमाणं करेइ, नन्नत्थ एगेणं खोमजुयलेणं अवसेसं सव्वं वत्थविहिं पच्चक्खाइ ।

तयाणंतरं च णं विलेवणविहिपरिमाणं करेइ, नन्नत्थ अगरु-कुंकुम-चंदणमादिएहिं, अवसेसं सव्वं विलेवणविहिं पच्चक्खाइ ।

तयाणंतरं च णं पुप्फविहिपरिमाणं करेइ, नन्नत्थ एगेणं सुद्धपउमेणं मालइकुसुमदामेणं वा, अवसेसं सव्वं पुप्फविहिं पच्चक्खाइ ।

तयाणंतरं च ण आभरण-विहिपरिमाणं करेइ, नन्नत्थ मट्ठकण्णेज्जएहिं नाममुद्दाए य अवसेसं सव्वं आभरणविहिं पच्चक्खाइ ।

तयाणंतरं च णं धुवणविहिपरिमाणं करेइ, नन्नत्थ अगरु-तुरुक्क-धूवमादिएहिं, अवसेसं सव्वं धूवणविहिं पच्चक्खाइ ।

तयाणंतरं च णं भोयणविहिपरिमाणं करेमाणे पेज्ज-विहिपरिमाणं करेइ, नन्नत्थ एगाए कट्ठपेज्जाए अवसेसं सव्वं पेज्जविहिं पच्चक्खाइ ।

तयाणंतरं च णं भक्खविहिपरिमाणं करेइ, नन्नत्थ एगेहिं घयपुण्णेहिं खंडखज्जएहिं वा अवसेसं सव्वं भक्खविहिं पच्चक्खाइ ।

तयाणंतरं च णं ओदणविहिपरिमाणं करेइ, नन्नत्थ कलमसालि ओदणेणं अवसेसं सव्वं ओदणविहिं पच्चक्खाइ ।

तयाणंतरं च सूवविहिपरिमाणं करेइ, नन्नत्थ कलायसूवेणं वा मुग्गसूवेण वा माससूवेण वा, अवसेसं सव्वं सूवविहिं पच्चक्खाइ ।

तयाणंतरं च णं घयविहिपरिमाणं करेइ, नन्नत्थ सारदिएणं गोघयमंडेणं अवसेसं सव्वं

घयविहिं पच्चक्खाइ ।

तयाणंतरं च णं सागविहिपरिमाणं करेइ, नन्नत्थ वत्थुसाएणं वा तुंबसाएण वा सुत्थिसाएण वा मंडुक्कियसाएण वा, अवसेसं सव्वं सागविहिं पच्चक्खाइ ।

तयाणंतरं च णं माहुरयविहिपरिमाणं करेइ, नन्नत्थ एगेणं पालंकासाहुरणं, अवसेसं सव्वं माहुरयविहिं पच्चक्खाइ ।

तयाणंतरं च णं जेमणविहिपरिमाणं करेइ, नन्नत्थ सेहंबदालियंबेहिं, अवसेसं सव्वं जेमणविहिं पच्चक्खाइ ।

तयाणंतरं च णं पाणियविहिपरिमाणं करेइ, नन्नत्थ एगेणं अंतलिकखोदणं, अवसेसं सव्वं पाणियविहिं पच्चक्खाइ ।

तयाणंतरं च णं मुहवासविहिपरिमाणं करेइ, नन्नत्थ पंचसोगंधिणं तंबोलेणं, अवसेसं सव्वं मुहवासविहिं पच्चक्खाइ ।

तयाणंतरं च णं चउच्चिहं अणद्धादंडं पच्चक्खाइ तं जहा- अवज्झाणाचरितं पमायाचरितं हिंसप्पयाणं पावकम्मोवदेसे ।

[९] इह खलु! आनंदाइ समणे भगवं महावीरे आनंदं समणोवासणं एवं वयासी- एवं खलु आनंदा! समणोवासणं अभिगयजीवाजीवेणं जाव अणइक्कमणिज्जेणं सम्मत्तस्स पंच अतियारा पेयाला जाणि-यच्चा न समायरियच्चा, तं जहा- संका कंखा वित्तिगिच्छा परपासंडपसंसा परपासंडसंथवे ।

तयाणंतरं च णं थूलगस्स पाणाइवायवेरमणस्स समणोवासणं पंच अतियारा पेयाला जाणियच्चा न समायरियच्चा, तं जहा- बंधे वहे छविच्छेदे अतिभारे भत्तपाणवोच्छेदे ।

तयाणंतरं च णं थूलगस्स मुसावायवेरमणस्स समणोवासणं पंच अतियारा जाणियच्चा न समायरियच्चा तं जहा- सहसाअब्भक्खाणे रहस्सब्भक्खाणे सदारमंतभेए मोसेवएसे कूडलेहकरणे ।

तयाणंतरं च णं थूलगस्स अदिन्नादाणवेरमणस्स समणोवासणं पंच अतियारा जाणियच्चा न समायरियच्चा तं जहा- तेणाहडे तक्करप्पओगे विरुद्धरज्जातिककमे कूडतुलकूडमाणे तप्पडि-रूवगववहारे ।

तयाणंतरं च णं सदारसंतोसीए समणोवासणं पंच अतियारा जाणियच्चा न समायरियच्चा तं जहा- इत्तरियपरिग्गहियागमणे अपरिग्गहियागमणे अणंगकिइडा परविवाहकरणे कामभोगेतित्वाभिलासे ।

तयाणंतरं च णं इच्छापरिमाणस्स समणोवासणं पंच अतियारा जाणियच्चा न समायरियच्चा तं जहा- खेत्तवत्थुपमाणातिककमे हिरण्णसुवण्णपमाणातिककमे धणधण्णपमाणातिककमे दुपयचउप्पयपमाणतिककमे कुवियपमाणातिककमे ।

तयाणंतरं च णं दिसिवयस्स समणोवासणं पंच अतियारा जाणियच्चा न समायरियच्चा तं जहा- उड्ढदिसिपमाणातिककमे अहोदिसिपमाणातिककमे तिरियदिसिपमाणातिककमे खेत्तवुड्ढी सतिअंतरद्धा ।

तयाणंतरं च णं उवभोगपरिभोगे दुविहे पन्नत्ते तं जहा- भोयणओ कम्मओ य, तत्थ णं भोयणओ सम-णोवासणं पंच अतियारा जाणियच्चा न समायरियच्चा, तं जहा- सचित्ताहारे सचित्तपडिबद्धाहारे अप्पउलि-ओसहिभक्खणया दुप्पउलिओसहिभक्खणया तुच्छोसहिभक्खणया,

कम्मओ णं समणोवासएणं पन्नरस कम्मादाणां जाणियच्चाइं न समायरियच्चाइं तं जहा-
इंगालकम्ममे वणकम्ममे साडीकम्ममे भाडीकम्ममे फोडीकम्ममे दंतवाणिज्जे लक्खवाणिज्जे रसवाणिज्जे विसवा-
अज्झयणं-१

णिज्जे केसवाणिज्जे जंतपीलणकम्ममे निल्लंछणकम्ममे दवग्गिदावणया सरदहतलागपरिसोसणया असती-
जणपोसणया ।

तयाणंतरं च णं अणट्ठादंड-वेरमणस्स समणोवासएणं पंच अतियारा जाणियच्चा न
समायरियच्चा तं जहा- कंदप्पे कुक्कुइए मोहरिए संजुत्ताहिकरणे उवभोगपरिभोगातिरित्ते ।

तयाणंतरं च णं सामाइयस्स समणोवासएणं पंच अतियारा जाणि-यच्चा न समायरियच्चा तं
जहा- मणदुप्पणिहाणे वइदुप्पणिहाणे कायदुप्पणिहाणे सामाइयस्स सतिअ-करणया सामाइयस्स
अणवट्ठियस्स करणया ।

तयाणंतरं च णं देसावगासियस्स समणोवासएणं पंच अतियारा जाणियच्चा न समायरियच्चा
तं जहा- आणवणप्पओगे पेसणवणप्पओगे सद्धानुवाए रूवाणुवाए बहियापोग्गलपक्खेवे ।

तयाणंतरं च णं पोसहोववासस्स समणोवासएणं पंच अतियारा जाणियच्चा न समाय-
रियच्चा तं जहा- अप्पडिलेहिय-दुप्पडिलेहिय-सिज्जासंधारे अप्पमज्जिय-दुप्पमज्जिय-सिज्जासंधारे अप्पडि-
लेहिय-दुप्पडिलेय-उच्चारपासवणभूमी अप्पमज्जिय-दुप्पमज्जिय-उच्चारपासवणभूमी पोसहोववासस्स सम्मं
अणणुपालणया ।

तयाणंतरं च णं अहासंविभागस्स समणोवासएणं पंच अतियारा जाणियच्चा न समाय-
रियच्चा तं जहा- सचित्तनिकखेवणया सचित्तपिहणया कालातिककमे परववदेसे मच्छरिया ।

तयाणंतरं च णं अपच्छिम-मारणंतिय-संलेहणा-झूसणाराहणाए पंच अतियार जाणियच्चा न
समायरियच्चा तं जहा इहलोगासंसप्पओगे परलोगासंसप्पओगे जीवियासंसप्पओगे मरणासंसप्पओगे
कामभोगासंसप्पओगे ।

[१०] तए णं से आनंदे गाहावई समणस्स भगवओ महावीरस्स अंतिए पंचाणुव्वइयं
सत्तसिक्खावइयं- दुवालसविहं सावयधम्मं पडिवज्जति पडिवज्जित्ता समणं भगवं महावीरं वंदइ नमंसइ
वंदित्ता नमंसित्ता एवं वयासी-

नो खलु मे भंते! कप्पइ अज्जप्पभिइं अण्णउत्थिए वा अण्णउत्थिय-देवयाणि वा
अण्णउत्थिय-परिग्गहियाणि वा अरहंतचेइयाइं वंदित्तए वा नमंसित्तए वा, पुव्विं अणालत्तेणं आलवित्तए
वा संलवित्तए वा, तेसिं असणं वा पाणं वा खाइमं वा साइमं वा ताउं वा अनुप्पदाउं वा, नन्नत्थ
रायाभिओगेणं गणाभिओगेणं बलाभिओगेणं देवयाभिओगेणं गुरुनिग्गहेणं वित्तिकंतारेणं ।

कप्पइ मे समणे निग्गंथे फासुएणं एसणिज्जेणं असण-पाण-खाइम-साइमेणं वत्थ-पडिग्गह-
कंबल-पायपुंछणेणं पीढ-फलग-सेज्जा-संधारएणं ओसह-भेसज्जेण य पडिलाभेमाणस्स विहरित्तए-त्ति कट्ठ
इमं एयारूवं अभिग्गहं अभिगिण्हइ अभिगिण्हित्ता पसिणाइं पुच्छइ पुच्छित्ता अट्ठाइं आदियइ आदियत्ता
समणं भगवं महावीरं तिकखुत्तो वंदइ नमंसइ वंदित्ता नमंसित्ता समणस्स भगवओ महावीरस्स
अंतियाओ दूइपलासाओ चेइयाओ पडिणिक्खमइ पडिणिक्खमित्ता जेणेव वाणियगामे नयरे जेणेव सए गिहे
जेणेव सिवानंदा भारिया तेणेव उवागच्छइ उवागच्छित्ता सिवानंद भारियं एवं वयासी-

एवं खलु देवाणुप्पिए! मए समणस्स भगवओ महावीरस्स अंतिए धम्मं निसंते, से वि य धम्मं मे इच्छिए पडिच्छिए अभिरुइए, तं गच्छाहि णं तुमं देवाणुप्पिए! समणं भगवं महावीरं वंदाहि जाव पज्जुवासाहि, समणस्स भगवओ महावीरस्स अंतिए पंचाणुव्वइयं सत्तसिक्खावइयं-दुवालसविहं गिहिधम्मं अज्झयणं-१

पडिवज्जाहि ।

[११] तए णं सा सिवानंदा भारिया आनंदेणं समणोवासएणं एवं वुत्ता समाणा हट्ठुट्ठा० जाव सद्दावेइ सद्दावेत्ता एवं वयासी- खिप्पामेव लहुकरणजुत्त-जोइयं जाव पज्जुवासइ ।

तए णं समणे भगवं महावीरे सिवानंदाए तीसे य महइ जाव धम्मं परिकहेइ, तए णं सा सिवानंदा समणस्स भगवओ महावीरस्स अंतिए धम्मं सोच्चा निसम्म हट्ठुट्ठ- जाव गिहिधम्मं पडिवज्जइ पडिवज्जित्ता० तमेव धम्मियं जाणप्पवरं दुरुहइ दुरुहिक्ता जामेव दिसं पाउब्भूया तामेव दिसं पडिगया ।

[१२] भंतेति भगवं गोयमे समणं महावीरं वंदइ नमंसइ वंदित्ता नमंसित्ता एवं वयासी- पहू णं भंते! आणंदे समणोवासए देवाणुप्पियाणं अंतिए मुंडे जाव पव्वइत्तए? नो इण्ठे समंठे,

गोयमा! आणंदे णं समणोवासए बहूइं वासाइं समणोवासगपरियागं पाउणिहित्ति पाउणिहित्ता सोहम्मं कप्पे अरुणाभे विमाणे देवत्ताए उववज्जिहित्ति ।

तत्थ णं अत्थेगइयाणं देवाणं चत्तारि पलिओवमाइं ठिई पन्नत्ता, तत्थ णं आणंदस्स वि समणोवासगस्स चत्तारि पलिओवमाइं ठिई पन्नत्ता भविस्सई ।

तए णं समणे भगवं! महावीरे अण्णदा कदाइ जाव विहरइ ।

[१३] तए णं से आणंदे समणोवासए जाए- अभिगयजीवाजीवे जाव पडिलाभेमाणे विहरइ ।

तए णं सा सिवानंदा भारिया समणोवासिया जाया-जाव पडिलाभे-माणी विहरइ ।

[१४] तए णं तस्स आनंदस्स समणोवासगस्स उच्चावएहिं सीलव्वयगुण-वेरमण- पच्चक्खाण-पोसहोववासेहिं अप्पाणं भावेमाणस्स चोदस संवच्छराइं वीइक्कंताइं, पन्नरसमस्स संवच्छरस्स अंतरा वट्ठमाणस्स अण्णदा कदाइ पुव्वरत्तावरत्तकालसमयंसि धम्मजागरियं जागरमाणस्स इमेयारूवे अज्झत्थिए चिंतिए पत्थिए मणोगए संकप्पे समुप्पज्जित्ता-

एवं खलु अहं वाणियगामे नयरे बहूणं राईसर-जाव सयस्स वि य णं कुडुंबस्स जाव आधारे, तं एतेणं वक्खेवेणं अहं नो संचाएमि समणस्स भगवओ महावीरस्स अंतियं धम्मपन्नत्तिं उवसंपज्जित्ता णं विहरित्तए । तं सेयं खलु ममं कल्लं जाव जलंते विपुलं असणं-पाणं-खाइमं-साइमं जहा पूरणो जाव जेड्डपुत्तं कुडुंबे ठवेत्ता तं मित्तं जाव जेड्डपुत्तं च आपुच्छित्ता कोल्लाए सण्णिवेसे नायकुलंसि पोसहसालं पडिलेहित्ता समणस्स भगवओ महावीरस्स अंतियं धम्मपन्नत्तिं उवसंपज्जित्ता णं विहरित्तए-

एवं संपेहइ संपेहेत्ता कल्लं जाव तहेव जिमियमुत्तुत्तरागए तं मित्तं जाव विउलेणं पुप्फ० सक्कारेइ सम्माणेइ सक्कारेत्ता सम्माणेत्ता तस्सेव मित्तं जाव पुरओ जेड्डपुत्तं सद्दावेइ सद्दावेत्ता एवं वयासी एवं खलु पुत्ता! अहं वाणियगामे नयरे बहूणं राईसर जहा चिंतियं जाव विहरित्तए, तं सेयं खलु मम इदाणिं तुमं सयस्स कुडुंबस्स मेढिं पमाणं आहारं आलबणं चक्खुं ठावेत्ता जाव विहरित्तए ।

तए णं से जेड्डपुत्ते आणंदस्स समणोवासगस्स तह त्ति एयमट्ठं विणएणं पडिसुणेति ।

तए णं से आनंदे समणोवासए तस्सेव मित्त जाव पुरओ जेइपुत्तं कुडुंबे ठावेति ठावेत्ता एवं वयासी- मा णं देवाणुप्पिया! तुब्भे अज्जप्पभिइं केइ ममं बहूसु कज्जेसु जाव आपुच्छउ वा पडिपुच्छउ वा ममं अद्वाए असणं वा पाणं वा खाइमं वा साइमं वा उवक्खडेउ वा उवकरेउ वा ।

तए णं से आणंदे समणोवासए जेइपुत्तं मित्त-नाइं० आपुच्छइ आपुच्छित्ता सयाओ गिहाओ

अज्झयणं-१

पडिणिक्खमइ पडिणिक्खमित्ता वाणियगामं नयरं मज्झमज्झेणं निग्गच्छइ निग्गच्छित्ता जेणेव कोल्लाए सण्णिवेसे जेणेव नायकुले जेणेव पोसहसाला तेणेव उवागच्छइ उवागच्छित्ता पोसहसालं पमज्जइ पमाज्जित्ता उच्चार-पासवणभूमि पडिलेहेइ पडिलेहेत्ता दब्भसंथारयं संथरेइ संथरेत्ता दब्भसंथारयं दुरुहइ दुरहित्ता पोसहसालाए पोसहिए जाव दब्भसंथारोवगए समणस्स भगवओ महावीरस्स अंतियं धम्मपण्णत्तिं उवसंपज्जित्ता णं विहरइ ।

[१५] तए णं से आणंदे समणोवासए उवासगपडिमाओ उवसंपज्जित्ता णं विहरइ, तए णं से आणंदे समणोवासए पढमं उवासगपडिमं अहासुत्तं अहाकप्पं अहामग्ग अहातच्चं सम्मं काएणं फासेइ पालेइ सोहेइ तीरेइ कित्तेइ आराहेइ ।

तए णं से आणंदे समणोवासए दोच्चं उवासगपडिमं एवं तच्चं चउत्थं पंचमं छडुं सत्तमं अडुमं नवमं दसमं एक्कारसमं आराहेइ ।

[१६] तए णं से आणंदे समणोवासए इमेणं एयारूवेणं ओरालेणं विउत्तेणं पयत्तेणं पग्गहिणं तवोकम्मणेणं सुक्के जाव किसे धमणिसंतए जाए ।

तए णं तस्स आणंदस्स समणोवासगस्स अण्णदा कदाइ पुव्वरत्ता जाव धम्मजागरियं जागरमाणस्स अयं अज्झत्थिए चिंतिए पत्तिए मणोगए संकप्पे समुप्पज्जित्था-एवं खलु अहं इमेणं जाव धम्मणिसंत जाए, तं जाव अत्थि ता मे उट्ठाणे जाव सद्धा-धिइ-संवेगे जाव य मे धम्मायरिए धम्मोवएसए समणे भगवं महावीरे जिणे सुहत्थी विहरइ ताव ता मे सेयं कल्लं जाव जलंते अपच्छिम्ममारणंतियसंलेहणा-झूसणा-झूसियस्स भत्तपाण-पडियाइक्खि-यस्स कालं अणवकंखमाणस्स विहरित्तए-एवं संपेहेइ संपेहेत्ता कल्लं अपच्छिम्म मारणंतिय जाव कालं अणवकंखमाणे विहरइ ।

तए णं तस्स आणंदस्स समणोवासगस्स अण्णदा कदाइ सुभेणं अज्झवसाणेणं सुभेणं परिणामेणं लेसाहिं विसुज्झमाणीहिं तदावरणिज्जाणं कम्माणं खओवसमेणं ओहिनाणे समुप्पण्णे- पुरत्थिमे णं लवणसमुद्दे पंचजोयणसयाइं खेत्तं जाणि पासइ, एवं दक्खिणेणं पच्चत्थिमेण य, उत्तरे णं जाव चुल्लहिमंलवंतं वासधरपव्वयं जाणइ पासइ, उड्ढं जाव सोहम्मं कप्पं जाणइ पासइ, अहे जाव इमीसे रयणप्पभाए पुढवीए लोलुयच्चुतं नरयं चउरासीतिवाससहस्सट्ठितियं जाणइ पासइ ।

[१७] तेणं कालेणं तेणं समएणं समणे भगवं महावीरे समोसरिए, परिसा निग्गया, जाव पडिगया ।

तेणं कालेणं तेणं समएणं समणस्स भगवओ महावीरस्स जेइ अंतेवासी इंदभूई नामं अणगारे गोयमसगोत्ते णं सत्तुस्सेहे समचउरसंसंठाणणसंठिए वज्जरिसएनारायणसंघयणे कणगपुल्लगनिघस-पम्हगोरे उग्गतवे दित्ततवे तत्ततवे महातवे ओराले घोरे घोरगुणे घोरतवस्सी

घोरबंभचरवासी उच्छूढसरीरे संखित्त-विउलतेयलेस्से छडुंछट्टेणं अणिकिखत्तेणं तवोकम्मणं संजमेणं तवसा अप्पाणं भावेमाणे विहरइ ।

तए णं से भगवं गोयमे छट्ठक्खमणपारणगंसि पढमाए पोरिसीए सज्झायं करेइ बिइयाए पोरिसीए झाणं झियाइं तइयाए पोरिसीए अतुरियमचवलमसंभंते मुहपोत्तियं पडिलेहेइं पडिलेहेत्ता भायणवत्थाइं पडिलेहेइं पडिलेहेत्ता भायणाइं पमज्जइं पमज्जित्ता भायणाइं उग्गाहेइं उग्गाहेत्ता जेणेव समणे भगवं महावीरे तेणेव उवागच्छइं उवागच्छित्ता समणं भगवं महावीरं वंदइं नमंसइं वंदित्ता नमंसित्ता एवं वयासी-

अज्झयणं-१

इच्छामि णं भंते तुब्भेहिं अब्भणुण्णाए समाणे छट्ठक्खमणपारणगंसि वाणियगामे नयरे उच्च-नीच-मज्झिमाइं कुलाइं घरसमु-दाणस्स भिक्खायरियाए अडित्तए, अहासुहं देवाणुप्पिया मा पडिबंथं करेह ।

तए णं भगवं गोयमे समणेणं भगवया महावीरेणं अब्भणुण्णाए समाणे समणस्स भगवओ महावीरस्स अंतियाओ दूइपलासाओ चेइयाओ पडिणिक्खमइं पडिणिक्खमित्ता अतुरियमचवलमसंभंते जुगंतरपलोणाए दिट्ठीए पुरओ इरियं सोहेमाणे-सोहेमाणे जेणेव वाणियगामे नयरे तेणेव उवागच्छइं उवागच्छित्ता वाणियगामे नयरे उच्च-नीयमज्झिमाइं कुलाइं घरसमुदाणस्स भिक्खायरियं अडइं ।

तए णं से भगवं गोयमे वाणियगामे नयरे जहा पन्नत्तीए तहा जाव भिक्खायरियाए अडमाणे अहापज्जत्तं भत्तपाण पडिग्गाहेइं पडिग्गाहेत्ता वाणियगामाओ नयराओ पडिणिग्गच्छइं पडिणिग्गच्छित्ता कोल्लायस्स सण्णिवेसस्स अदूरसामंतेणं वीईवयमाणे बहुजणसदं निसामेइं बहुजणो अण्णमण्णस्स एवमाइक्खइं एवं भासइं एवं पण्णवेइं एवं परूवेइं-

एवं खलु देवाणुप्पिया! समणस्स भगवओ महावीरस्स अंतेवासी आनंदे नामं समणोवासए पोसहसाए अपच्छिम जाव अणवखंमाणे विहरइ ।

तए णं तस्स गोयमस्स बहुजणस्स अंतिए एयमट्ठं सोच्चा निसम्म अयमेयारूवे अज्झत्थिए जाव समुप्पज्जित्था-तं गच्छामि णं आणंदं समणोवासयं पासामि-एवं संपेहेइं संपेहेत्ता जेणेव कोल्लाए सण्णिवेसे जेणेव पोसहसाला जेणेव आणंदे समणोवासए तेणेव उवागच्छइं ।

तए णं से आनंदे समणोवासए भगवं गोयमं एज्जमाणं पासइं पासित्ता हट्ठतुइं जाव हियए भगवं गोयमं वंदइं नमंसइं वंदित्ता नमंसित्ता एवं वयासी- एवं खलु भंते! अहं इमेणं ओरालेणं जाव किसे धमणिसंतए जाए, नो संचाएमि देवाणुप्पियस्स अंतियं पाउब्भवित्ता णं तिक्खुत्तो मुद्धानेणं पादे सु अभिवंदित्तए, तुब्भे णं भंते! इच्छाक्कारेणं अणभिओएणं इओ चेव एह, जे णं देवाणुप्पियाणं तिक्खुत्तो मुद्धानेणं पादेसु वंदामि नमंसामि ।

तए णं से भगवं गोयमे जेणेव आनंदे समणोवासए तेणेव उवागच्छाइं ।

[१८] तए णं से आनंदे समणोवासए भगवओ गोयमस्स तिक्खुत्तो मुद्धानेणं पादेसु वंदइं नमंसइं वंदित्ता नमंसित्ता एवं वयासी- अत्थि णं भंते! गिहिणो गिहज्झावसंतस्स ओहिनाणे समुप्पज्जइं? हंता अत्थि!

जइं णं भंते! गिहिणो जाव समुप्पज्जइं, एवं खलु भंते! वि गिहिणो गिहमज्झावसंतस्स ओहिनाणे समुप्पण्णे-पुरत्थिमे णं लवणसमुद्दे पंचजोयणसयाइं जाव लोलुयच्चुतं नरयं जाणामि पासामि।

तए णं से भगवं गोयमे आनंद समणोवासयं एवं वयासी- अत्थि णं आनंदा! गिहिणो जाव समुप्पज्जइ, नो चेव णं एमहालए, तं णं तुमं आणंदा! एयस्स ठाणस्स आलोएहिं जाव तवोकम्मं पडिवज्जाहिं ।

तए णं से आणंदे समणोवासए भगवं गोयमं एवं वयासी- अत्थि णं भंते! जिणवयणे संताणं तच्चाणं तहियाणं सब्भूयाणं भावाणं आलोइज्जइ जाव पडिवज्जिइ? नो इणद्वे समद्वे ।

जइ णं भंते! जिणवयणे संताणं जाव भावाणं नो आलोइज्जइ जाव तवोकम्मं नो पडिवज्जिइ तं णं भंते! तुब्भे चेव एयस्स ठाणस्स आलोएह जाव पडिवज्जेह ।

अज्झयणं-१

तए णं से भगवं गोयमे आणंदेणं समणासएणं एवं वुत्ते समाणे संकिए कंखिए वित्तिगिच्छसमावण्णे आणंदस्स समणोवासगस्स अंतियाओ पडिणिक्खमइ पडिणिक्खमित्ता जेणेव दूइपलासे चेइए जेणेव समणे भगवं महावीरे तेणेव उवागच्छइ उवागच्छित्ता समणस्स भगवओ महावीरस्स अदूरसामंते गमणागमणाए पडिक्कमइ पडिक्कमित्ता एसणमणेसणं आलोएइ आलोएत्ता भत्तपाण पडिदंसेइ पडिदंसित्ता समणं भगवं महावीरं वंदइ नमंसइ वंदित्ता नमंसित्ता एवं वयासी-

एवं खलु भंते! अहं तुब्भेहिं अब्बणुण्णाए तं चेव सव्वं कहेइ जाव तए णं अहं संकिए कंखिए वित्तिगिच्छसमावण्णे आणंदस्स समणोवासगस्स अंतियाओ पडिणिक्खामि पडिणिक्खमित्ता जेणेव इहं तेणेव हव्वामागए, तं णं भंते! किं आणंदेणं समणोवासएणं तस्स ठाणस्स आलोएयव्वा जाव पडिवज्जेयव्वं उदाहु मए?

गोयमाइ समणे भगवं महावीरे भगवं गोयमं एव वयासी- गोयमा! तुमं चेव णं तस्स ठाणस्स आलोएहिं जाव पडिवज्जाहिं, आणंदं च समणोवासयं एयमद्वं खामेहिं ।

तए णं से भगवं गोयमे समणसा भगवओ महावीरस्स तह त्ति एयमद्वं विणएणं पडिसुणेइ पडिसुणेत्ता तस्स ठाणस्स आलोएइ जाव पडिवज्जइ, आणंदं च समणोवासयं एयमद्वं खामेइ ।

तए णं समणे भगवं महावीरे अण्णदा कदाइ बहिया जणवयविहारं विहरइ ।

[१९] तए णं से आनंदे समणोवासए बहूहिं सील-व्वएहिं जाव अप्पाणं भावेत्ता वीसं वासाइं समणोवासगपरियागं पाउणित्ता एक्कारस य उवासगपडिमाओ सम्मं काएणं फासित्ता मासियाए संलेहणाए अत्ताणं झूसित्ता सद्धिं भत्ताइं अणसणाए छेदेत्ता आलोइय-पडिक्कंते समाहिपत्ते कालमासे कालं किच्चा सोहम्मं कप्पे सोहम्मवडंसगस्स महाविमाणस्स उत्तरपुरत्थिमे णं अरुणाभे विमाणे देवत्ताए उववण्णे ।

तत्थ णं अत्थेगइयाणं देवाणं चत्तारि पलिओवमाइं ठिई पन्नत्ता तत्थ णं आणंदस्स वि देवस्स चत्तारि पलिओवमाइं ठिई पन्नत्ता ।

आनंदे णं भंते! देवे ताओ देवलोगाओ आउक्खएणं भवक्खएणं ठिइक्खएणं अणंतरं चयं चइत्ता कहिं गच्छिहिइ कहिं उववज्जिहिइ? गोयमा! महाविदेहे वासे सिज्झिहिइ० निक्खेवो ।

० पढमं अज्झयणं समत्तं ०

० मुनि दीपरत्नसागरेण संशोधितः सम्पादितश्च पढमं अज्झयणं समत्तं ०

[[बीअं अज्झयणं-कामदेवे]]

[२०] जइ णं भंते! समणेणं भगवया महावीरेणं जाव संपत्तेणं सत्तमस्स अंगस्स उवासगदसाणं पढमस्स अज्झयणस्स अयमद्वे पन्नत्ते, दोच्चस्स णं भंते! अज्झयणस्स के अद्वे पन्नत्ते?

एवं खलु जंबू! तेणं कालेणं तेणं समणेणं चंपा नामं नयरी होत्था, पुण्णभद्वे चेइए, जियसत्तू राया, कामदेवे गाहावई, भद्दाभारिया, छ हिरण्णकोडीओ निहाणपउत्ताओ छ हिरण्णकोडीओ वड्ढिपउताओ छ हिरण्णकोडीओ पवित्थरपउत्ताओ छ वया दसगोसाहस्सिएणं वएणं होत्था । समोसरणं ।

जहा आणंदो तहा निग्गओ, तहेव सावयधम्मं पडिवज्जइ, सा चेव वत्तव्वया जाव जेड्डपुत्तं मिच्च-नाइं आपुच्छित्ता जेणेव पोसहसाला तेणेव उवागच्छइ उवागच्छित्ता जहा आणंदो जाव समणस्स भग-

अज्झयणं-२

वओ महावीरस्स अंतियं धम्मपन्नत्ति उवसंपज्जित्ता णं विहरइ ।

[२१] तए णं तस्स कामदेवस्स समणोवासगस्स पुव्वरत्तावरत्तकालसमयंसि एगे देवे मायी मिच्छदिट्ठी अंतियं पाउब्भूए ।

तए णं से देवे एगं महं पिसायरूवं विउव्वइ तस्स णं दिवस्स पिसायरूवस्स इमे एयारूवे वण्णावासे पन्नत्ते-सीसं से गोकिलंज-संठाण-संठिय सालिभसेल्ल-सरिसा से केसा कविलतेणं दिप्पमाणा महल्ल उट्ठिया-कमल्ल-संठाण-संठियं निडालं मुगुंसपुच्छं व तस्स भुमकाओ फुग्गफुग्गओ विगय-बीभत्सदंसणाओ सीसघडिविणिग्गयाइं अच्छीणि विगय-बीभत्स-दंसणाइं कण्णा जह सुप्प-कत्तरं चेव विगय-बीभत्स-दंसणिज्जा, उरब्भपुडसंनिभा से नासा, झुसिरा जमल-चुल्ली-संठाण-संठिया दो वि तस्स नासापुडया, घोडयपुच्छं व तस्स मंसूइं कविल-कविलाइं विगय-बीभत्स-दंसणाइं, उट्ठा उट्ठस्स चेव लंबा, फालसरिसा से दंता, जिब्भा जह जुप्प-कत्तरं चेव विगय-बीभत्स-दंसणाइं,

उट्ठा उट्ठस्स चेव लंबा फालसरिसा से दंता, जिब्भा जह सुप्प-कत्तरं चेव विगय-बीभत्सदंसणिज्जा हल-कुड्डाल-संठिया से हणुया, गल्ल-कडिल्लं च तस्स खड्डं फुट्टं कविलं फरुसं महल्लं, मुड्ढंगाकारोवमे से खंधे, पुवरकवाडोवमे से वच्छे, कोट्टिया-संठाण-संठिया दो वि तस्स बाहा, निसापाहाण-संठाण-संठिया दो वि तस्स अग्गहत्था, निसालोढ-संढाण-संठियाओ हत्थेसु अंगुलीओ, सिप्पि-पुडगसंठिया से नक्खा, ण्हाविय-पसेवओ व्व उरंसि लंबंति दो वि तस्स थणया, पोट्टं अयकोट्टओ व्व वट्टं, पाण-कलंद-सरिसा से नाही, सिक्कग-संठाण-संठिए से नेत्ते किण्णपुडसंठाण-संठिया दो वि तस्स वसणा, जमल-कोट्टिया-संठाण-संठिया दो वि तस्स ऊरू,

अज्जुण-गुट्ठ व तस्स जाणूइं कुडिल-कुडिलाइं विगय-बीभत्सदंसणाइं, जंधाओ कक्खडीओ लोमेहिं उवचियाओ, अहरी-संठाण-संठिया दो वि तस्स पाया, अहरी-लोढ-संठाण-संठियाओ पाएसु अंगुलीओ, सिप्पिपुडसंठिया से नक्खा लडह-मडह-जाणुए विगय-भग्ग-भुग्ग-भुमए अवदालिय-वयण-विवर-निल्लालियग्गजीहे सरड-कयमालियाए उंदुरमाला-परिणद्ध-सुकयचिंधे नउल-कयकण्णपूरे सप्पकयवेगच्छे अप्पोडंते अभिगज्जंते भीम-मुक्कट्टट्टहासे नाणाविह-पंचवण्णेहिं लोमेहिं उवचिए एगं महं नीलुप्पल-गवलगुलिय अयसिकुसुमप्पगासं असिं खुरधारं गहाय जेणेव पोसहसाला जेणेव कामदेवे समणोवासए तेणेव उवागच्छइ उवागच्छित्ता आसुरत्ते रुट्ठे कुविए चंडिककिए मिसिमिसीयमाणे कामदेवं समणोवासयं एवं वयासी-

हं भो! कामदेवा! समणोवासया अप्पत्थियत्थिया दुरंत-पंत-लक्खणा हीणपुण्णचाउद्दसिया सिरि-हिरि-धिइ-कित्ति-परिवज्जिया! धम्मकामया पुन्नकामया सग्गकामया मोक्खकामया धम्मकंखिया पुन्नकंखिया सग्गकंखिया मोक्खकंखिया धम्मपिवासिया पुन्नपिवासिया सग्गपिवासिया मोक्ख-पिवासिया! नो खलु कप्पइ तव देवाणुप्पिया! जंसीलाइं वयाइं वेरमणाइं पच्चक्खाणाइं पोसहोववासाइं चालित्तए वा खोभित्तए वा खंडित्तए वा भंजित्तए वा उज्झित्तए वा परिच्चइत्तए वा, तं जइ णं तुमं अज्ज सीलाइं जाव पोसहोववसाइं न छइडेसि न भंजेसि तो तं अहं अज्ज इमेणं नीलुप्पल जाव असिणा खंडाखंडि करेमि, जहा- णं तुमं देवाणुप्पिया! अट्ट-दुहट्ट-वसट्टे अकाले चेव जीवियाओ ववरोविज्जसि ।

तए णं से कामदेवे समणोवासए तेणं दिव्वेणं पिसायरूवेणं एवं वुत्ते समाणे अभीए अतत्थे अणुव्विग्गे अखुभिए अचलिए असंभंते तुसिणीए धम्मज्झाणोवगए विहरइ ।

अज्झयणं-२

[२२] तए णं से दिव्वे पिसायरूवे कामदेवं समणोवासयं अभीयं जाव धम्मज्झाणोवगयं विहरमाणं पासइ पासित्ता, दोच्चं पि तच्चं पि कामदेवं समणोवासयं एवं वयासी हं भो कामदेवा! समणोवासया अपत्थियपत्थिया जइ णं तुमं अज्ज जाव जीवियाओ ववरोविज्जसि ।

तए णं से कामदेवे समणोवासए तेणं दिव्वेणं पिसायरूवेणं दोच्चं पि तच्चं पि एवं वुत्ते समाणे अभीए जाव धम्मज्झाणोवगए विहरइ ।

तए णं से दिव्वे पिसायरूवे कामदेवं समणोवासयं अभीयं जाव विहरमाणं पासइ पासित्ता आसुरत्ते जाव तिवलियं भिउडिं निडाले साहट्टु कामदेवं समणोवासयं नीलुप्पल-जाव असिणा खंडाखंडि करेइ ।

तए णं से कामदेवे समणोवासए तं उज्जलं जाव दुरहियासं वेयणं सम्मं सहइ जाव अहियासेइ ।

[२३] तए णं से दिव्वे पिसायरूवे कामदेवं समणोवासयं अभीयं जाव विहरमाणं पासइ पासित्ता जाहे नो संचाएइ कामदेवं समणोवासयं निग्गंथाओ पावयणाओ चालित्तए वा खोभित्तए वा विपरिणित्तए वा ताहे संते तंते परितंते सणियं सणियं पच्चोसक्कइ पच्चोसक्कित्ता पोसहसालाओ पडिणिक्खमइ पडिक्खिक्खमित्ता दिव्वं पिसायरूवं विप्पजहइ विप्पजहित्ता ।

एगं महं दिव्वं हत्थिरूवं विउव्वइ-सत्तंगपइडियं सम्मं संठियं सुजातं पुरतो उदग्गं पिडुतो वराहं अयाकुच्छिं अलंबकुच्छिं पलंब-लंबोदराधरकरं अब्भुग्गय-मउल-मल्लिया-विमल-धवलदंतं कंचणोसी-पविट्टदंतं आणामिय-चावललिय-संवेल्लियग्गसोंडं कुम्म-पडिपुण्णचलणं वीसतिनखं अल्लीण-पमाण-जुत्तपुच्छं मत्तं मेहमिव गुलुगुलेतं मण-पवण-जइणवेगं-दिव्वं हत्थिरूवं विउव्वित्ता जेणेव पोसहसाला जेणेव कामदेवे समणोवासए तेणेव उवागच्छइ उवागच्छित्ता कामदेवं समणोवासयं एवं वयासी-

हं भो! कामदेवा! समणोवासया तहेव भणइ न भंजेसि तो तं अहं अज्ज सोंडाए गेण्हामि गेण्हित्ता पोसहसालाओ नीणेमि नीणेत्ता उड्ढं वेहासं उव्विहामि उव्विहित्ता तिक्खेहं दंतमुसलेहिं पडिच्छामि पडिच्छित्ता अहे धरणितलंसि तिक्खुत्तो पाएसु लोलेमि जहा- णं तुमं देवाणुप्पिया! अट्ट-दुहट्ट-वसट्टे अकाले चेव जीवियाओ ववरोविज्जसि ।

तए णं से कामदेवे समणोवासए तेणं दिव्वेणं हत्थिरेणं एवं वुत्ते समाणे अभीए जाव विहरइ।

तए णं से दिव्वे हत्थिरूवे कामदेवं समणोवासयं अभीयं जाव विहरमाणं पासइ पासित्ता दोच्चं पि तच्चं पि कामदेवं [समणोवासयं एवं वयासी- हं भो कामदेवा! तहेव जाव सोऽवि विहरइ ।

तए णं से दिव्वे हत्थिरूवे कामदेवं समणोवासयं अभीयं जाव विहरमाणं पासइ पासित्ता आसुरत्ते रुद्धे कुविए चंडिकिए मिसिमिसीयमाणे कामदेवं समणोवासयं सोंडाए गेण्हेति गेण्हित्ता उड्डं वेहासं उव्विहइ उव्विहित्ता तिक्खेहिं दंतमुसलेहिं पडिच्छइ पडिच्छित्ता अहे धरणितलंसि तिक्खुत्तो पाएसु लोलेइ ।

तए णं से कामदेवे समणोवासए तं उज्जलं जाव अहियासेइ ।

[२४] तए णं से दिव्वे हत्थिरूवे कामदेवं समणोवासयं जाहे नो संचाएइ जाव सणियं-सणियं पच्चोसक्कइ पच्चोसक्कित्ता पोसहसालाओ पडिणिक्खमइ पडिणिक्खमित्ता दिव्वं हत्थिरूवं विप्प-अज्झयणं-२

जहइ विप्पजहित्ता एगं महं दिव्वं सप्परूवं विउव्वइ उग्गविसं चंडविसं घोरविसं महाकायं मसीमूसाकालगं नयणविसरोसपुण्णं अंजणपुंज-निगरप्पगासं रत्तच्छं लोहियलोयणं जमलजुयलचंचलचलंत-जीहं घरणीयल-वेणिभूयं उक्कड-फुड-कुडिल-जडिल-कक्कस-वियड-फडाडोवकरणदच्छंलोहागर-धम्ममाण-धमधमेतघोसं अणाग-लियदिव्व-पचडरोसंदिव्वं सप्परूवं विउववित्ता जेणेव पोसहसाला जेणेव कामदेवे समणोवासए तेणेव उवागच्छइ उवागच्छित्ता कामेदेवं समणोवासयं एवं वयासी-

हं भो कामदेवा! समणोवासया जाव न भंजेसि तो ते अज्जेव अहं सरसरस्स कायं दुरुहामि दुरुहित्ता पच्छिमेणं भाएणं तिक्खुत्तो गीवं वेढेमि वेढित्ता तिक्खाहिं विसपरिगताहिं दाढाहिं उरंसि चेव निकुट्टेमि जहा- णं तुमं देवाणुप्पिया! अट्ट-दुहट्ट-वसट्टे अकाले चेव जीवियाओ ववरोविज्जसि ।

तए णं से कामदेवे समणोवासए तेणं दिव्वेणं सप्परूवेणं एवं वुत्ते समाणे अभीए जाव विहरइ, सोऽवि दोच्चं पि तच्चं पि भणइ, कामदेवोऽवि जाव विहरइ ।

तए णं से दिव्वे सप्परूवे कामदेवं समणोवासयं अभीयं जाव पासइ पासित्ता आसुरत्ते रुद्धे कुविए चंडिकिए मिसिमिसीयमाणे कामदेवस्स सरसरस्स कायं दुरुहइ दुरुहित्ता पच्छिमेणं भाएणं तिक्खुत्तो गीवं वेढेइ वेढित्ता तिक्खाहिं विसपरिगताहिं दाढाहिं उरंसि चेव निकुट्टेइ ।

तए णं से कामदेवे समणोवासए तं उज्जलं जाव अहियासेइ ।

[२५] तए णं से दिव्वे सप्परूवे कामदेवं समणोवासयं अभीयं जाव पासइ पासित्ता जाहे नो संचाएइ कामदेवं समणोवासयं निग्गंथाओ पावयणाओ चालित्तए वा खोभित्तए वा विपरिणामेत्ते वा ताहे संते तंते परितंते सणियं सणियं पच्चोसक्कइ पच्चोसक्कित्ता पोसहसालाओ पडिणिक्खमइ पडिणिक्खमित्ता दिव्वं सप्परूवं विप्पजहइ विप्पजहित्ता एगं महं दिव्वं देवरूवं विउव्वइ-हार-विराइय-वच्छं जाव दस दिसाओ उज्जोवेमाणं पभासेमाणं पासाईयं दरिसणिज्जं अभिरूवं पडिरूवं दिव्वं देवरूवं विउव्वइ विउव्वित्ता कामदेवस्स समणोवासयस्स पोसहसालं अनुप्पविसइ अनुप्पविसित्ता अंतलिक्खपडिवण्णे संखिखिणियाइ पंचवण्णाइ वत्थाइ पवर परिहिए कामदेवं समणोवासयं एवं वयासी-

हं भो कामदेवा! समणोवासया, घण्णे सि णं तुमं देवाणुप्पिया! सपुण्णे कयत्थे कयलक्ख-णेसि सुलद्धे णं तव देवाणुप्पिया! माणुस्सए जम्मजीवियफले, जस्स णं तव निग्गंथे पावयणे इमेयारूवा पडिवत्ती लद्धा पत्ता अभिसमण्णागया । एवं खलु देवाणुप्पिया! सक्के देविंदे देवराया जाव सक्कंसि

सीहास-णंसि चउरासीईए सामाणियसाहस्सीणं जाव अण्णेसिं च बहूणं देवाण य देवीण य मज्झगए एवमाइक्खइ एवं भासइ एवं पन्नवेइ एवं परूवेइ-

एवं खलु देवा! जंबुद्वीवे दीवे भारहे वासे चंपाए नयरीए कामदेवे समणोवासए पोसहसालाए पोसहिए बंभचारी जाव दब्भसंथारो-वगए समणस्स भगवओ महावीरस्स अंतियं धम्मपन्नत्तिं उवसंपज्जित्ता णं विहरइ, नो खलु से सक्के केणइ देवेण वा दाणवेण वा जाव गंधव्वेण वा निग्गंथाओ पावयणाओ चालित्तए वा खोभित्तए वा विपरिणामेत्तए वा, तए णं अहं सक्कस्स देविंदस्स देवरण्णो एयमद्वं असद्वहमाणे अपत्तियामाणे अरोएमाणे इहं हव्वमागए, तं अहो णं देवाणुप्पियाणं! इइढी जाव अभिसमण्णागए, तं दिट्ठा णं देवाणुप्पियाणं इइढी जाव अभिसमण्णागए ।

तं खामेमि णं देवाणुप्पिया! खमंतु णं देवाणुप्पिया! खंतुमरिहंति णं देवाणुप्पिया! नाइं भुज्जो करणयाए त्ति कट्ठु पायवडिए पंजलिउडे एयमद्वं भुज्जो-भुज्जो खामेइ खामेत्ता जामेव दिसं अज्झयणं-२

पाउब्भूए तामेव दिसं पडिगए ।

तए णं से कामदेवे समणोवासए निरुवसग्गमिति कट्ठु पडिमं पारेइ ।

तेणं कालेणं तेणं समएणं समणे भगवं महावीरे जाव विहरइ ।

[२६] तए णं से कामदेवे समणोवासए इमीसे कहाए जाव लद्धे समाणे- एवं खलु समाणे भगवं महावीरे जाव विहरइ, तं सेयं खलु मम समणं भगवं महावीरं वंदित्ता नमंसित्ता ततो पडिणियत्तस्स पोसहं पारेत्तए त्ति कट्ठु एवं संपेहेइ संपेहेत्ता जाव सुद्धप्पावेसाइं मंगल्लाइं वत्थाइं जाव अप्पमहग्घं जाव मणुस्सवग्गुरापरिक्खित्ते सयाओ गिहाओ पडिणिक्खमित्ता चंपं नयरिं मज्झंमज्झेणं निग्गच्छइ निग्गच्छित्ता जेणेव पुन्नभद्वे चेइए जहा- संखे जाव पज्जुवासइ ।

तए णं समणे भगवं महावीरे कामदेवस्स समणोवासयस्स तीसे य महइमहालियाए परिसाए जाव धम्मं परिकहेइ धम्मकहा समत्ता ।

[२७] कामदेवाइ! समणे भगवं महावीरे कामदेवं समणोवासयं एवं वयासी- से नूणं कामदेवा! तुब्भं पुव्वरत्तावरत्तकालसमयंसि एगे देवे अंतिए पाउब्भूए ।

तए णं से देवे एगं महं दिव्वं पिसायरूवं विउव्वइ विउव्वितत्ता आसुरत्ते रुढे कुविए चंडिक्किए मिसिमिसीयमाणे एगं महं नीलुप्पल जाव असिं गहाय तुमं एवं वयासी- हं भो कामदेवा! जाव जीवियाओ ववरोविज्जसि, तं तुमं तेणं देवेणं एवं वुत्ते समाणे अभीए जाव विहरसि एवं वण्णगरहिया तिन्निवि उवसग्गा तहेव पडिउच्चारयव्वा जाव देवो पडिगओ, से नूणं कामदेवा अद्वे समद्वे?

हंता अत्थि,

अज्जो! ति समणे भगवं महावीरे बहवे समणे निग्गंथे य निग्गंथीओ य आमंत्तेत्ता एवं वयासी- जइ ताव अज्जो! समणोवासगा गिहिणो गिहमज्झावसंता दिव्व-माणुस-तिरिक्खजोणिए उवसग्गे सम्मं सहंति जाव अहियासैंति, सक्का पुणाइं अज्जो! समणेहिं निग्गंथेहिं दुवालसंगं गणिपडिगं अहिज्जमाणेहिं दिव्व-माणुस-तिरिक्खजोणिए उवसग्गे सम्मं सहित्तए जाव अहियासित्तए ।

ततो ते बहवे समणा निग्गंथा य निग्गंथीओ य समणस्स भगवओ महावीरस्स तह त्ति एयमद्वे विणएणं पडिसुणेंति ।

तए णं से कामदेवे समणोवासए हट्ठु-जाव समणं भगवं महावीरं पसिणाइं पुच्छइ अट्ठमादियइ, समणं भगवं महावीरं तिक्खुत्तो वंदइ नमंसइ वंदित्ता नमंसित्ता जामेव दिसं पाउब्भूए तामेव दिसं पडिगए ।

तए णं समणे भगवं महावीरे अण्णदा कदाइ चंपाओ नयरीओ पडिणिक्खमइ पडिणिक्खमित्ता बहिया जणवयविहारं विहरइ ।

[२८] तए णं से कामदेवे समणोवासए पढमं उवासगपडिमं उवसंपज्जित्ता णं विहरइ, तए तए णं से कामदेवे समणोवासए बहूहिं जाव भावेत्ता वीसं वासाइं समणोवासगपरियागं पाउणित्ता एक्कारस य उवासगपडिमाओ सम्मं काएणं फासित्ता मासियाए संलेहणाए अत्ताणं झूसित्ता सट्ठिं भत्ताइं अणसणाए छेदेत्ता आलोइय पडिक्कंते समाहिं पत्ते कालमासे कालं किच्चा सोहम्मं कप्पे सोहम्मवडिंसगस्स महाविमाणस्स उत्तरपुत्थिमे णं अरुणाभे विमाणे देवत्ताए उववण्णे ।

तत्थ णं अत्थेगइयाणं देवाणं चत्तारि पलिओवमाइं ठिई पन्नत्ता, कामदेवस्स वि देवस्स अज्झयणं-२

चत्तारि पलिओवमाइं ठिई पन्नत्ता? से णं भंते! कामदेवे ताओ देवलोगाओ आउक्खएणं भवक्खएणं ठिइक्खएणं अणंतरं चयं चइत्ता कहिं गमिहिइ कहिं उववज्जिहिइ? गोयमा! महाविदेहे वासे सिज्झिहिइ० ।

◦ बीअं अज्झयणं समत्तं ◦

◦ मुनि दीपरत्नसागरेण संशोधितः सम्पादित्तश्च बीअं अज्झयणं समत्तं ◦

▣ तइयं अज्झयणं-चुलणीपित्ता ▣

[२९] उक्खेवो तइयस्स अज्झयणस्स ।

एवं खलु जंबू! तेणं कालेणं तेणं समएणं वाणारसी नामं नयरी, कोट्टए चेइए, जियसत्तू राया,

तत्थ णं वाणारसीए नयरीए चुलणीपिता नामं गाहावई परिवसइ, अइडे जाव अपरिभूए, सामा भारिया अट्ठ हिरण्णकोडीओ निहाणपउत्ताओ अट्ठ हिरण्णकोडीओ वुड्ढिपउत्ताओ अट्ठ हिरण्णकोडीओ पवित्थरपउत्ताओ, अट्ठ वया दसगोसाहस्सिएणं वएणं जहा आणंदो, राईसर जाव सव्वकज्ज वट्ठावए यावि होत्था, सामी समोसडे, परिसा निग्गया, चुलणीपिया वि जहा आणंदो तहा निग्गओ, तहेव गिहिधम्मं पडिवज्जइ, गोयमा पुच्छा तहेव सेसं जहा कामदेवस्स जाव पोसहसालाए पोसहिए बंभयारी० समणस्स भगवओ महावीरस्स अंतियं धम्मपन्नत्तिं उवसंपज्जित्ता णं विहरइ ।

[३०] तए णं तस्स चुलणीपियस्स समणोवासयस्स पुव्वरत्तावरत्तकालसमयंसि एगे देवे अंतिय पाउब्भूए ।

तए णं से देवे एगं महं नीलुप्पल- जाव असिं गहाय चुलणीपियं समणोवासयं एवं वयासी- हं भो चुलणीपिता! समणोवासया जहा कामदेवो जाव न भंजेसि तो ते अहं अज्ज जेठपुत्तं साओ गिहाओ नीणेमि नीणेत्ता तव अग्गओ घाएमि घाएत्ता तओ मंससोल्ले करेमि करेत्ता आदाणभरियंसि कडाहयंसि अट्ठहेमि अट्ठहेत्ता तव गायं मंसेणं य सोणिएणं य आयंचामि जहा- णं तुमं अट्ठ-दुहट्ठ-वसट्ठे अकाले चेव जीवियाओ ववरोविज्जसि ।

तए णं से चुलणीपिता समणोवासए तेणं देवेणं एवं वुत्ते समाणे अभीए जाव विहरइ ।

तए णं से देवे चुलणीपियं समणोवासयं अभीयं जाव विहरमाणं पासइ पासित्ता दोच्चं पि तच्चं पि चुलणीपियं समणोवासयं एवं वयासी- हं भो चुलणीपिया समणोवासया! तं चेव भणइ सो जाव विहरइ,

तए णं से देवे चुलणीपियं समणोवासयं अभीयं जाव पासइ पासित्ता आसुरत्ते रुढे चंडिकिए मिसिमिसीयमाणे चुलणीपियस्स समणोवासस्स जेठ पुत्तं गिहाओ नीणेइ नीणेत्ता अग्गओ घाएइ घाएत्ता तओ मंससोल्ले करेइ करेत्ता आदाणभरियंसि कडाहयंसि अद्देइ अद्देत्ता चुलणीपियस्स समणोवासयस्स गायं मंसेण य सोणिण य आयंचइ ।

तए णं से चुलणीपित्ता समणोवासए तं उज्जलं जाव अहियासेइ ।

तए णं से देवे चुलणीपियं समणोवासयं अभीयं जाव पासइ पासित्ता दोच्चं पि चुलणीपियं समणोवासयं एवं वयासी- हं भो चुलणीपिता समणोवासया! अपत्थियपत्थिया जाव न भंजेसि तो ते अहं अज्ज मज्झिमं पुत्तं साओ गिहाओ नीणेमि नीणेत्ता तव अग्गओ घाएमि जहा जेठं पुत्तं तहेव भणइ तहेव

अज्झयणं-३

करेइ एवं तच्चं पि कणीयसं जाव अहियासेइ,

तए णं से देवे चुलणीपियं समणोवासयं अभीयं जाव पासइ पासित्ता चउत्थं पि चुलणीपियं समणोवासयं एवं वयासी- हं भो चुलणीपिया समणोवासया! अपत्थियपत्थिया जाव जइ णं तुमं जाव न भंजेसि, तओ ते अहं अज्ज जा इमातव माया भद्दा सत्थवाही देवयगुरुजणणी दुक्कर-दुक्करकारिया तं ते साओ गिहाओ नीणेमि नीणेत्ता तव अग्गओ घाएमि घाएत्ता तओ मंससोल्ले करेमि करेत्ता आदाणभरियंसि कडाहयंसि अद्देमि अद्देत्ता तव गायं मंसेण य सोणिण य आइंचामि जहा- णं तुमं अट्ट-दुहट्ट-वसट्टे अकाले चेव जीवियाओ ववरोविज्जसि ।

तए णं से चुलणीपिता समणोवासए तेणं देवेणं एवं वुत्ते समाणे अभीए जाव विहरइ ।

तए णं से देवे चुलणीपियं समणोवासयं अभीयं जाव विहरमाणं पासइ पासित्ता चुलणीपियं समणोवासयं दोच्चं पि तच्चं पि चुलणीपियं समणोवासयं एवं वयासी- हं भो चुलणीपिता समणोवासया! तहेव जाव ववरोविज्जसि ।

तए णं तस्स चुलणीपियस्स समणोवासयस्स तेणं देवेणं दोच्चं पि तच्चं पि एवं वुत्तस्स समाणस्स इमेयारुवे अज्झत्थिए० समुप्पज्जित्था- अहो णं इमे पुरिसे अणारिए अणारियबुद्धी अणारियाइं पावाइं कम्माइं समाचरति, जे णं ममं जेठं पुत्तं साओ गिहाओ नीणेइ नीणेत्ता मम अग्गओ घाएइ घाएत्ता जहा कयं तहा चिंतेइ जाव गायं० आयंचइ, जे णं ममं मज्झिमं पुत्तं साओ गिहाओ जाव सोणिण य आयंचइ, जे णं ममं कणीयसं पुत्तं साओ गिहाओ तहेव जाव आइंचइ,

जा वि य णं इमा ममं माया भद्दा सत्थवाही देवतं गुरु-जणणी दुक्कर-दुक्करकारिया तं पि य णं इच्छइ साओ गिहाओ नीणेत्ता मम अग्गओ घाएत्तए- तं सेयं खलु ममं एयं पुरिसं गिण्हित्ते त्ति कट्ठु उद्धाविए, से वि य आगासे उप्पइए, तेणं च खंभे आसाइए, महया-महया सद्देणं कोलाहले कए ।

तए णं सा भद्दा सत्थवाही तं कोलाहलसद्धं सोच्चा निसम्म जेणेव चुलणीपिया समणोवासए तेणेव उवागच्छइ उवागच्छित्ता चुलणीपियं समणोवासयं एवं वयासी- किण्णं पुत्ता! तुमं महया-महया सद्धेणं कोलाहले कए?

तए णं से चुलणीपिया समणोवासए अम्मयं भद्धं सत्थवाहिं एवं वयासी- एवं खलु अम्मो! न याणामि के वि पुरिसे आसुरत्ते० एगं महं नीलुप्पल जाव असिं गहाय ममं एवं वयासी- हंभो चुलणीपिया समणोवासया! अपत्थिय पत्थिया० जाव जइ णं तुमं जाव ववरोविज्जसि,

तए णं अहं तेणं पुरिसेणं एवं वुत्ते समाणे अभीए जाव विहरामि, तए णं से पुरिसे ममं अभीयं जाव विहरमाणं पासइ पासित्ता ममं दोच्चंपि तच्चंपि एवं वयासी- हं भो चुलणीपिया समणोवासया! तहेव जाव गायं आयंचइ ।

तए णं अहं त उज्जलं जाव अहियासेमि, एवं तहेव उच्चारयव्वं सव्वं जाव कणीयसं जाव आयचइ, अहं तं उज्जल जाव अहियासेमि ।

तए णं से पुरिसे ममं अभीयं जाव पासइ पासित्ता ममं चउत्थं पि एवं वयासी-हं भो चुलणीपिया समणोवासया! अपत्थिय पत्थिया० जाव जाव न भंजेसि, तो ते अहं अज्ज जा इमा माया देवत्तं गुरु जाव ववरोविज्जसि ।

तए णं अहं तेणं पुरिसेणं एवं वुत्ते समाणे अभीए जाव विहरामि, तए णं से पुरिसे दोच्चं अज्झयणं-३

पि तच्चं पि ममं एवं वयासी-हं भो चुलणीपिया समणोवासया! अज्ज जाव ववरोविज्जसि ।

तए णं तेणं पुरिसेणं दोच्चं पि तच्चं पि ममं एवं वुत्तस्स समाणस्स इमेयारूवे अज्झत्थिए० अहो णं इगे पुरिसे अणारिए जाव समाचरति, जे णं ममं जेढुं पुत्तं साओ गिहाओ तहेव जाव कणीयसं जाव आइंचइ, तुब्भे वि य णं इच्छइ साओ गिहाओ नीणेत्ता मम अग्गओ घाएत्तए, तं सेयं खलु ममं एयं पुरिसं गिण्हित्तए त्ति कट्ठु उद्धाविए, से वि य आगासे उप्पइए मए वि य खंभे आसाए महया-महया सद्धेणं कोलाहले कए,

तए णं सा भद्दा सत्थवाही चुलणीपियं समणोवासयं एवं वयासी- नो खलु केइ पुरिसे तव जेढुपुत्तं जाव कणीयसं पुत्तं साओ गिहाओ नीणेइ नीणेत्ता तव अग्गओ घाएइ, एस णं केइ पुरिसे तव उवसग्गं करेइ, एस णं तुमे विदरिसणे दिट्ठे, तं णं तुमं इयाणिं भग्गव्वए भग्गनियमे भग्गपोसहे विहरसि, तं णं तुमं पुत्ता! एयस्स ठाणस्स आलोएहि जाव पडिवज्जाहि ।

तए णं से चुलणीपिता समणोवासए अम्माए भद्दाए सत्थवाहीए तह त्ति एयमद्धं विणएणं पडिसुणेइ पडिसुणेत्ता तस्स ठाणस्स आलोएइ जाव पडिवज्जइ ।

[३१] तए णं से चुलणीपिता समणोवासए पढमं उवासगपडिमं उवसंपज्जित्ता णं विहरइ, पढमं उवासगपडिमं अहासुत्तं जहा आणंदो जाव एक्कारसवि । तए णं से चुलणीपित्ता समणोवासए तेणं ओरालेणं जहा कामदेवो जाव सोहम्मं कप्पे सोहम्मवडिसगस्स महाविमाणस्स उत्तरपुरत्थिमेणं अरुणप्पभे विमाणे देवत्ताए उववण्णे, चत्तारि पलिओवमाइं ठिई पन्नत्ता, महाविदेहे वासे सिज्झिहिइ० निक्खेवो ।

• तइयं अज्झयणं समत्तं •

• मुनि दीपरत्नसागरेण संशोधितः सम्पादित्तश्च तइअं अज्झयणं समत्तं •

॥ चउत्थं अज्झयणं-सुरादेवे ॥

[३२] उक्खेवो चउत्थस्स अज्झयणस्स,

एवं खलु जंबू! तेणं कालेणं तेणं समएणं वाणारसी नामं नयरी, कोट्टए चेइए, जियसत्तू राया, सुरादेवे गाहावइ, अइडे, छ हिरण्णकोडीओ जाव छ वया दसगोसाहस्सिएणं वएणं, धन्ना भारिया, सामी समोसडे, जहा आणंदो तहेव पडिवज्जइ गिहिधम्मं जहा कामदेवो जाव समणस्स भगवओ महावीरस्स अंतियं धम्मपन्नत्ति उवसं-पज्जित्ता णं विहरइ ।

[३३] तए णं तस्स सुरादेवस्स समणोवासयस्स पुव्वरत्तावरत्तकालसमयंसि एगे देवे अंतियं पाउब्भवित्था, तए णं से देवे एगं महं नीलुप्पल- असिं गहायं सुरादेवं समणोवासयं एवं वयासी- हं भो सुरादेवा समणोवासया! अप्पत्थिपत्थिया० जाव णं तुमं सीलाइं जाव न भंजेसि, तो ते अहं अज्ज जेइपुत्तं साओ गिहाओ नीणेमि नीणेत्ता तव अग्गओ घाएमि घाएत्ता पंच मंससोल्ले करेमि करेत्ता आदाणभरियंसि कडाहयंसि अद्दहेमि अद्दहेत्ता तव गायं मंसेण य सोणिण य आइंचामि जहा- णं तुमं० अकाले चेव जीवियाओ ववरोविज्जसि, एवं मज्झिमयं, कणीयसं, एक्केक्के पंच सोल्लया तहेव करेइ जहा चुलणीपियस्स, नवरं एक्केक्के पंच सोल्लया,

तए णं से देवे सुरादेवं समणोवासयं चउत्थं पि एवं वयासी- हं भो सुरादेवे समणोवासया! अपत्थियपत्थिया० जाव न परिच्चयासि तो ते अज्ज सरीरंसि जमगसमगमेव सोलस रोगायंके पक्खिवामि अज्झयणं-४

तं जहा- सासे कासे जाव कोढे, जहा- णं तुमं अट्ट-दुहट्ट- जाव ववरोविज्जसि ।

तए णं से सुरादेवे समणोवासए जाव विहरइ, एवं देवो दोच्चं पि तच्चं पिभणइ जाव ववरोविज्जसि ।

तए णं तस्स सुरादेवस्स समणोवासयस्स तेणं देवेणं दोच्चं पि तच्चं पि एवं वुत्तस्स समाणस्स इमेयारूवे अज्झत्थिए० अहो णं इमे पुरिसे अणारिए जाव समायरइ जे णं ममं जेइपुत्तं जाव कणीयसं जाव आयंचइ, जे वि य इमे सोलस रोगायंका ते वि य इच्छइ मम सरीरंसि पक्खिवित्तेए, तं सेयं खलु ममं एयं पुरिसं गिण्हित्तए त्ति कट्टु उद्घाविए, से वि य आगासे उप्पइए, तेण य खंभे आसाइए महया-महया सद्देणं कोलाहले कए ।

तए णं सा धन्ना भारिया कोलाहलसद्धं सोच्चा निसम्मं जेणेव सुरादेवे समणोवासए तेणेव उवागच्छइ उवागच्छित्ता एवं वयासी- किण्णं देवाणुप्पिया! तुब्भे णं महया-महया सद्देणं कोलाहले कए तए णं से सुरादेवे समणोवासए धन्ने भारियं एवं वयासी-एवं खलु देवाणुप्पिया न याणामि के वि पुरिसे तहेव कहेइ जहा चुलणी पिया, धन्नाऽवि पडिभणइ जाव कणीयसं, नो खलु देवाणुप्पिया! तुब्भं केऽवि पुरिसे सरीरं सि जमगसमगं सोलस रोगायंके पक्खिवइ, एस णं केऽवि पुरिसेतुब्भं उवसगं करेइ, सेसंजहा चुलणीपियस्स तहा भणइ एवं सेसं जहा चुलणीपियस्स निरवसेसं जाव सोहम्मे कप्पे अरुणकंते विमाणे उववण्णे, चत्तारि पलिओवमाइं ठिई, महाविदेहे वासे सिज्झहिइ० निक्खेवो ।

० चउत्थं अज्झयणं समत्तं ०

० मुनि दीपरत्नसागरेण संशोधितः सम्पादित्तश्च चउत्थं अज्झयणं समत्तं ०

॥ पंचमं अज्झयणं-चुल्लसयए ॥

[३४] एवं खलु जंबू! तेणं कालेणं तेणं समएणं आलभिया नामं नयरी, संखवणे उज्जाणे, जियसत्तू राया, चुल्लसयए गाहावई परिवसइ-अड्ढे जाव छ हिरण्णकोडीओ जाव छ व्वया दसगोसाहस्सिएणं वएणं, बहुला भारिया, सामी समोसढे, जहा आणंदो तहा गिहिधम्मं पडिवज्जइ, सेस जहा कामदेवो जाव धम्मपन्नत्ति उवसंपज्जित्ता णं विहरइ ।

[३५] तए णं तस्स चुल्लसयगस्स समणोवासयस्स पुव्वरत्तावरत्तकालसमयंसि एगे देवे अंतियं जाव असिं गहाय एवं वयासी-हंभो चुल्लसयगा समणोवासया! न भंजेसि तो ते अहं अज्ज जेड्डपुत्तं साओ गिहाओ नीणेमि एवं जहा चुलणीपियं, नवरं एक्केक्के सत्त मंससोल्लिया जाव कणीयसं जाव आयंचामि,

तए णं से चुल्लसयए समणोवासए जाव विहरइ ।

तए णं से देवे चुल्लसयगं समणोवासयं चउत्थं पि एवं वयासी- हं भो चुल्लसयगा समणो-वासिया! जाव न भंजसि तो ते अज्ज जाओ इमाओ छ हिरण्णकोडीओ निहाणपउत्ताओ छ वुड्ढिपउत्ताओ छ पवित्थरपउत्ताओ ताओ साओ गिहाओ नीणेमि नीणेत्ता आलभियाए नयरीए सिंघाडग-जाव पहेसु सव्वओ समंता विप्पइरामि, जहा- णं तुमं अट्ट-दुहट्ट-वसट्टे अकाले चेव जीवियाओ ववराविज्जसि ।

तए णं से चुल्लसयए समणोवासए तेणं देवेणं एवं वुत्ते समाणे अभीए जाव विहरइ ।

तए णं से देवे चुल्लसयगं समणोवासयं अभीयं जाव पासइ पासित्ता दोच्चं पि तच्चं पि तहेव भणइ जाव ववरोविज्जसि ।

अज्झयणं-५

तए णं तस्स चुल्लसयगस्स समणोवासयस्स तेणं देवेणं दोच्चं पि तच्चं पि एवं वुत्तस्स समाणस्स अयमेयारूवे अज्झत्थिए०-अहो णं इमे पुरिसे अणारिए जहा चुलणीपिया तहा चिंतेइ जाव कणीयसं जाव आयंचइ । जाओ वि य णं इमाओ ममं छ हिरण्णकोडीओ निहाणपउत्ताओ छ वुड्ढिपउत्ताओ छ पवित्थरपउत्ताओ, ताओ वि य णं इच्छइ ममं साओ गिहाओ नीणेत्ता आलभियाए नयरीए सिंघाडग जाव विप्पइरित्तए ।

तं सेयं खलु ममं एयं पुरिसं गिण्हित्तए त्ति कट्टु उद्धाविए जहा- सुरादेव तहेव भारिया पुच्छइ, तहेव कहेइ० ।

[३६] सेसंजहा चुलणीपियस्स जाव सोहम्मे कप्पे अरुणसिद्धे विमाणे उववन्न, चत्तारि पलिओवमाइं ठिई सेसं तहेव जाव महाविदेहे वासे सिज्झिहिइ । निक्खेवो०

० पंचमं अज्झयणं समत्तं ०

० मुनि दीपरत्नसागरेण संशोधितः सम्पादित्तश्च पंचमं अज्झयणं समत्तं ०

॥ छट्ठं अज्झयणं-कुंडकोलिए ॥

[३७] छट्ठस्स उक्खेवओ०

एवं खलु जंबू! तेणं कालेणं तेणं समएणं कंपिल्लपुरे नयरे, सहस्संबवणे उज्जाणे, जियसत्तू राया, कुंडकोलिए गाहावई, पूसा भारिया, छ हिरण्णकोडीओ निहाणपउत्ताओ छ वुड्ढिपुत्ताओ छ पवित्थरपउत्ताओ छव्वया दसगोसाहस्सिएणं वएणं । सामी समोसढे, जहा कामदेवो तहा सावयधम्मं पडिवज्जइ । सच्चेव वत्तव्वया जाव पडिलाभेमाणे विहरइ ।

[३८] तए णं से कुंडकोलिए समणोवासए अण्णदा कदाइ पच्चावरण्हकालसमयंसि जेणेव असोगवणिया जेणेव पुढविसिलापट्टए तेणेव उवागच्छइ उवागच्छित्ता नाममुद्दगं च उत्तरिज्जगं च पुढविसिलापट्टए ठवेइ ठवेत्ता समणस्स भगवओ महावीरस्स अंतियं धम्मपन्नत्तिं उवसंपज्जित्ता णं विहरइ ।

तए णं तस्स कुंडकोलियस्स समणोवासयस्स एगे देवे अंतियं पाउब्भवित्था, तए णं से देवे नाममुद्दगं च उत्तरिज्जगं च पुढविसिलापट्टयाओ गेण्हइ गेण्हित्ता सखिंखिणिं अंतलिक्खपडिवण्णे कुंडकोलियं समणोवासयं एवं वयासी- हं भो कुंडकोलिया समणोवासया! सुंदरी णं देवाणुप्पिया गोसालस्स मंखलिपुत्तस्स धम्मपन्नत्ती- नत्थि उट्ठाणे इ वा कम्मए इ वा बले इ वा वीरिए इ वा पुरिसक्कार-परक्कमे इ वा नियता सव्वभावा, मंगुली णं समणस्स भगवओ महावीरस्स धम्मपन्नत्ती-अत्थि उट्ठाणे इ वा जाव परक्कमे इ वा अनियया सव्वभावा,

तए णं से कुंडकोलिए समणोवासए तं देवं एवं वयासी- जइ णं देवाणुप्पिया! सुंदरी णं गोसालस्स मंखलिपुत्तस्स धम्मपन्नत्ती नत्थि उट्ठाणेइवा जाव नियमा सव्वभावा, मंगुली णं समणस्स भगवओ महावीरस्स धम्मपन्नत्ती अत्थी उट्ठाणे इ वा जाव अनियता सव्वभावा, तुमे णं देवाणुप्पिया! इमा एयारूवा दिव्वा देविड्ढी दिव्वा देवज्जुई दिव्वे देवाणुभावे किण्णा लद्धे किण्णा पत्ते किण्णा अभिसमण्णागए किं उट्ठाणेणं जाव पुरिसक्कार-परक्कमेणं उदाहु अणुट्ठाणेणं अकम्ममेणं जाव अपुरिसक्कार-परक्कमेणं?

तए णं से देवे कुंडकोलियं समणोवासयं एवं वयासी-एवं खलु देवाणुप्पिया! मए इमा अज्झयणं-६

एयारूवा दिव्वा देविड्ढी० अणुट्ठाणेणं जाव अपुरिसक्कारपरक्कमेणं लद्धे पत्ते अभिसमण्णागए ।

तए णं से कुंडकोलिए समणोवासए तं देवं वयासी-जइ णं देवाणुप्पिया! तुमे इमा एयारूवा दिव्वा देविड्ढी० अनुट्ठाणेणं जाव अपुरिक्कारपरक्कमेणं लद्धे पत्ते अभिसमण्णागए, जेसि णं जीवाणं नत्थि उट्ठाणे इ वा परक्कमे इ वा ते किं न देवा? अहं णं तुब्भे इमा एयारूवा दिव्वा देविड्ढी० उट्ठाणेणं जाव परक्कमेणं लद्धे पत्ते अभिसमण्णागए तो जं वदसि सुंदरी णं गोसालस्स मंखलिपुत्तस्स धम्मपन्नत्ती नत्थि उट्ठाणे इ वा जाव नियता सव्वभावा, मंगुली णं समणस्स भगवओ महावीरस्स धम्मपन्नत्ती-अत्थि उट्ठाणे इ वा जाव अणियता सव्वभावा, तं ते मिच्छा ।

तए णं से देवे कुंडकोलिएणं समणोवासएणं एवं वुत्ते समाणे संकिए जाव कलुससमावण्णे नो संचाएइ कुंडकोलियस्स समणोवासयस्स किंचि पामोक्खमाइक्खित्तए, नाममुद्दगं च उत्तरिज्जयं च पुढविसिलपट्टए ठवेइ ठवेत्ता जामेव दिसं पाउब्भूए ताममेव दिसं पडिगए ।

तेणं कालेणं तेणं समएणं सामी समोसढे, तए णं से कुंडकोलिए समणोवासए इमीसे कहाए लद्धे हइ जहा- कामदेवो तहा निगच्छइ जाव पज्जुवासइ, धम्मकहा ।

[३९] कुंडकोलिया इ समणे भगवं महावीरे कुंडकोलियं समणोवासयं एवं वयासी-से नूणं कुंडकोलिया! कल्लं तुब्भं पच्चावरण्हकालसमयंसि असोवणियाए एगे देवे अंतियं पाउब्भवित्था, तए णं से देवे नाममुद्दगं च तहेव जाव पडिगए ।

तं धन्ने सि णं तुमं कुंडकोलिया जहा कामदेवो से नूणं कुंडकोलिया अट्ठे समट्ठे? हंता अत्थि, अज्जोति समणे भगवं महावीरे, समणा निग्गंथा य निग्गंथीओ य आमंतेत्ता एवं वयासी-जइ ताव अज्जो गिहिणो गिहिमज्झावसंता अण्णउत्थिए अट्ठेहि हेऊहि य पसिणेहि य कारणे हि य वागरणेहि य

निप्पट्ट-पसिणवागरणे करेति सक्का पुणाइं अज्जो समणेहिं निग्गंथेहि दुवालसंगं गणिपिडगं अहिज्जमाणेहिं अण्णउत्थिया अट्ठेहिं य जाव निप्पट्ट-पसिणवागरणा करेत्तए ।

तए णं ते समणा निग्गंथा य निग्गंथीओ य समणस्स भगवओ महावीरस्स तहा त्ति एयमट्ठं विगएणं पडिसुणेति ।

तए णं से कुंडकोलिए समणोवासए समण भगवं महावीरं वंदइ नमंसइ वंदित्ता नमंसित्ता पसिणाइं पुच्छइ पुच्छित्ता अट्ठमादियइ अट्ठमादियत्ता जामेव दिसं पाउब्भूए तामेव दिसं पडिगए, सामी बहिया जणवयविहारं विहरइ ।

[४०] तए णं तस्स कुंडकोलियस्स बहूहि सील जाव भावेमाणस्स चोदस संवच्छराइं वीइक्कंताइं पन्नरसमस्स संवच्छरस्स अंतरा वट्ठमाणस्स अन्नदा कदाइ जहा कामदेवो तहा जेडुपुत्तं ठवेत्ता तहा पोसहसालाए जाव धम्मपन्नत्तिं उवसंपज्जित्ता णं विहरइ एवं एक्कारस उवासगपडिमाओ तहेव जाव सोहम्मे कप्पे अरुणज्झए विमाणे जाव अंते काहिइ ।। निक्खेवो०

० छट्ठं अज्झयणं समत्तं ०

० मुनि दीपरत्नसागरेण संशोधितः सम्पादित्तश्च छट्ठं अज्झयणं समत्तं ०

॥ सत्तमं अज्झयणं-सदालपुत्ते ॥

[४१] सत्तमस्स उक्खेवो०

अज्झयणं-७

पोलासपुर नामं नयरं, सहस्संबवणं उज्जाणं, जियसत्तू राया,

तत्थ णं पोलासपुरे नयरे सदालपुत्ते नामं कुंभकारे आजीविओवासए परिवसइ, आजीवियसयमयंसि लद्धट्ठे गहियट्ठे पुच्छियट्ठे विणिच्छियट्ठे अभिगयट्ठे अट्ठिमिंजपेमाणुरागरत्ते य अयमाउसो! आजीवियसमए अट्ठे अयं परमट्ठे सेसे अणट्ठे त्ति आजीवियसमएणं अप्पाणं भावेमाणे विहरइ ।

तस्स णं सदालपुत्तस्स आजीविओवासगस्स एक्का हिरण्णकोडी निहाणपउताओ एक्का वड्ढिपउत्ताओ एक्का पवित्थरपउत्ताओ एक्के वए दसगोसाहस्सिएणं वएणं ।

तस्स णं सदालपुत्तस्स आजीविओवास- गस्स अग्गिमित्ता नामं भारिया होत्था ।

तस्स णं सदालपुत्तस्स आजीविओवासगस्स पोलासपुरस्स नगरस्स बहिया पंच कुंभकारा- वणसया होत्था ।

तस्स णं बहवे पुरिसा दिण्णभइ-भत्तवेयणा कल्लाकल्लिं बहवे करए य वारए य पिहडए य घडए य अद्धघडए य कलसए य अलिंजरए य जंबूलए य उट्ठियाओ य करेति, अण्णे य से बहवे पुरिसा दिण्ण-भइ-भत्तवेयणा कल्लाकल्लिं तेहिं बहुहं करएहि य जाव उट्ठियाहि य रायमग्गंसि वित्तिं कप्पेमाणा विहरंति ।

[४२] तए णं से सदालपुत्ते आजीविओवासए अण्णदा कदाइ पच्चावरण्हकालसमयंससि जेणेव असोगवणिया तेणेव उवागच्छइ उवागच्छित्ता गोसालस्स मंखलिपुत्तस्स अंतियं धम्मपन्नत्तिं उवसं-पज्जित्ता णं विहरइ ।

तए णं तस्स सदालपुत्तस्स आजीविओवासगस्स एक्के देवे अंतियं पाउब्भवित्था, तए णं से देवे अंतलिक्खपडिवण्णे सखिंखिणाइं जाव परिहिए सदालपुत्तं आजिविओवासयं एवं वयासी-

एहिइ णं देवाणुप्पिया कल्लं हइं महामाहणे उप्पन्ननाणदंसणधरे तीयप्पडुपण्णाणागयजाणए अरहा जिणे केवली सव्वण्णू सव्वदरिसी तेलोक्कवहिय-महिय-पूइए सदेवमणुयासुरस्स लोगस्स अच्चणिज्जे पूयणिज्जे वंदणिज्जे नमंसणिज्जे सक्कारणिज्जे संमाणाणिज्जे कल्लाणं मंगलं देवंय चेइयं जाव पज्जुवासणिज्जे तच्च-कम्मसंपयासंपउत्ते, तं णं तुमं वंदेज्जाहि जाव पज्जुवासेज्जाहि, पाडिगहारिएणं पीढ-फलग-सेज्जासंधारएणं उवनिमंतेज्जाहिं, दोच्चं पि तच्चं पि एवं वयइ वइत्ता जामेव दिसं पाउब्भूए तामेव दिसं पडिगए ।

तए णं तस्स सद्दालपुत्तस्स आजिविओवागस्स तेणं देवेणं एवं वुत्तस्स समाणस्स इमेयारूवे अज्झत्थिए चित्थिए पत्थिए मणोगए संकप्पे समुप्पण्णे- एवं खलु ममं धम्मायरिए धम्मोवएसए गोसाले मंखलिपुत्ते- से णं महामाहणे उप्पन्न-नाणदंसणधरे तच्च-कम्मसंपया-संपउत्ते से णं कल्लं इह हव्वमागच्छिस्सति ।

तए णं तं अहं वंदिस्सामि जाव पज्जुवासिस्सामि पाडिहारिएणं जाव उवनिमंतिस्सामि ।

[४३] तए णं कल्लं जाव जलंते समणे भगवं महावीरे जाव समोसरिए, परिसा निग्गया जाव पज्जुवासइ ।

तए णं सेसद्दालपुत्ते आजीवओवासए इमीसे कहाए लद्धे समाणे- एवं खलु समण भगवं महावीरे जाव विहरइ, तं गच्छामि णं समणं भगवं महावीरं वंदामि जाव पज्जुवासामि, एवं संपेहेइ संपेहेत्ता

अज्झयणं-७

णहाए जाव पायच्छित्ते सुद्धप्पावेसाइं जाव अप्पमहग्घाभरणालंकियसरीरे मणुस्सवग्गुरापरिगए साओ गिहाओ पडिणिक्खमइ पडिणिक्खमित्ता पोलासपुरं नयरं मज्झं-मज्झेणं निग्गच्छइ निग्गच्छित्ता जेणेव सहस्संबवणे उज्जाणे जेणेव समणे भगवं महावीरे तेणेव उवागच्छइ उवागच्छित्ता तिक्खुत्तो आयाहिण-पयाहिणं करेइ करेत्ता वंदइ नमंसइ वंदित्ता नमंसित्ता जाव पज्जुवासइ ।

तए णं समणे भगवं महावीरे सद्दालपुत्तस्स आजीविओवासगस्स तीसे य महइ जाव धम्मकहा समत्ता ।

सद्दालपुत्ता इ समणे भगवं महावीरे सद्दालपुत्तं आजीविओवासयं एवं वयासी- से नूणं सद्दालपुत्ता! कल्लं तुमं पच्चावरणहकालसमयंसि जेणेव असोगवणिया जाव विहरसि ।

तए णं तुब्भं एगे देवे अतियं पाउब्भवित्था, तए णं से देवे अंतलिक्खपडिवण्णे० एवं वयासी- हं भो सद्दालपुत्ता! तंचेव सव्वं जाव पज्जुवासिस्सामि । से नूणं सद्दालपुत्ता! अट्ठे समट्ठे? हंता अत्थि, तं नो खलु सद्दालपुत्ता तेणं देवेणं गोसालं मंखलिपुत्तं पणिहाय एवं वुत्ते ।

तए णं तस्स सद्दालपुत्तस्स आजीविओवासयस्स समणेणं भगवया महावीरेणं एवं वुत्तस्स समाणस्स इमेयारूवे अज्झत्थिए चित्थिए पत्थिए मणोगए संकप्पे समुप्पण्णे एस णं समणे भगवं महावीरे महामाहणे उप्पन्ननाणदंसणधरे जाव तच्च-कम्मसंपया-संपउत्ते, तं सेयं खलु ममं समणं भगवं महावीरं वंदित्ता नमंसित्ता पाडिहारिएणं पीढ-फलग सेज्जा-संधारएणं उवनिमंतेत्तए-

एवं संपेहेइ संपेहेत्ता उट्ठाए उट्ठेइ उट्ठेत्ता समणं भगवं महावीरं वंदइ नमंसइ वंदित्ता नमंसित्ता एवं वयासी- एवं खलु भंते! मम पोलासपुरस्स नयरस्स बहिया पंच कुंभारावणसया, तत्थ णं तुब्भे पाडिहारियं पीढ-फलग-सेज्जा-संधरयं ओगिणिहत्ता णं विहरइ ।

तए णं से समणे भगवं महावीरे सद्दालपुत्तस्स आजीविओवासगस्स एयमद्वं पडिसुणेइ पडिसुणेत्ता सद्दालपुत्तस्स आजिवोओवासगस्स पंचसु कुंभारावणसएसु फासु-एसणिज्जं पाडिहारियं पीढ-फलग-सेज्जा-संधारयं ओगिण्हित्ता णं विहरइ ।

[४४] तए णं से सद्दालपुत्ते आजीविओवासए अण्णदा कदाइ वाताहतयं कोलालमंडं अंतो सालाहितो बहिया नीणेइ नीणेत्ता आयवंसि दलयइ ।

तए णं समणे भगवं महावीरे सद्दालपुत्तं आजीविओ-वासयं एवं वयासी- सद्दालपुत्ता! एस णं कोलालभंडे कहं कतो?

तए णं से सद्दालपुत्ते आजीविओवासए समणं भगवं महावीरं एवं वयासी- एस णं भंते! पुत्विं मट्टिया आसी, तओ पच्छा उदएणं निगिज्जइ निगिज्जित्ता छारेण य करिसेण य एगयओ मीसिज्जइ मीसिज्जित्ता चक्के आरुभिज्जति, तओ बहवे करगा य जाव उट्टियाओ य कज्जति ।

तए णं समणे भगवं महावीरे सद्दालपुत्तं आजीविओवासयं एवं वयासी-सद्दालपुत्ता एस णं कोलालभंडे किं उट्टाणेणं जाव पुरिसक्कार-परक्कमेणं कज्जति उदाहु अनुट्टाणेणं जाव अपुरिसक्कार-परक्कमेणं कज्जति? तए णं से सद्दालपुत्ते आजीविओवासए समणं भगवं महावीरं एवं वयासी-भंते! अनुट्टाणेणं जाव अपुरिसक्कारपरक्कमेणं, नत्थि उट्टाणे इ वा जाव परक्कमे इ वा, नियता सव्वभावा ।

तए णं समणे भगवं महावीरे सद्दालपुत्तं आजीविओवासयं एवं वयासी- सद्दालपुत्ता! जइ णं तुब्भं केइ पुरिसे वाताहतं वा पक्केल्लयं वा कोलालभंडं अवहरेज्जा वा विक्खिरेज्ज वा भिंदेज्जा वा अज्झयणं-७

अच्छिं-देज्जा वा परिट्ठवेज्जा वा अग्गिमित्ताए वा भारियाए सद्धिं विउलाइं भोगभोगाइं भुंजमाणे विहरेज्जा।

तस्स णं तुमं पुरिसस्स कं दंडं वत्तेज्जासि? भंते! अहं णं तं पुरिसं आओसेज्जा वा हणेज्जा वा बंधेज्जा वा महेज्जा वा तज्जेज्जा वा तालेज्जा वा निच्छोडेज्जा वा निब्भच्छेज्जा वा अकाले चेव जीवियाओ ववरोवेज्जा ।

सद्दालपुत्ता! नो खलु तुब्भं केइ पुरिसे वाताहतं वा पक्केल्लयं वा कोलालभंडं अवहरइ वा जाव परिट्ठवेइ वा अग्गिमित्ताए भारियाए सद्धिं विउलाइं भोगभोगाइं भुंजमाणे विहरइ, नो वा तुमं तं पुरिसं आओसेसि वा हणेसि वा जाव अकाले चेव जीवियाओ ववरोवेसि, जइ नत्थि उट्टाणे इ वा जाव परक्कमे इ वा नियता सव्वभावा अहं णं तुब्भं केइ पुरिसे वाताहतं वा जाव परिट्ठेइ वा अग्गिमित्ताए वा भारियाए सद्धिं विउलाइं भोगभोगाइं भुंजमाणे विहरइ, तुमं वा तं पुरिसं आओसेसि वा जाव ववरोवेसि तो जं वदसि नत्थि उट्टाणे इ वा जाव नियता सव्वभावा तं ते मिच्छा, एत्थ णं से सद्दालपुत्ते आजीविओवासए संबुद्धे ।

तए णं से सद्दालपुत्ते आजीविओवासए समणं भगवं महावीरं वंदइ नमंसइ वंदित्ता नमंसित्ता एवं वयासी- इच्छामि णं भंते! तुब्भं अंतिए धम्मं निसामेत्तए, तए णं समणे भगवं महावीरे सद्दालपुत्तस्स आजीविओवासगस्स तीसे य जाव धम्मं परिकहेइ ।

[४५] तए णं से सद्दालपुत्ते आजीविओवासए समणस्स भगवओ महावीरस्स अंतिए धम्मं सोच्चा निम्म हट्ठुत्तु जावं हियए जहा आणंदो तहा गिहिधम्मं पडिवज्जइ नवरं एगा हिरण्णकोडी निहाणपउत्ता एगा हिरण्णकोडी पवित्थरपउत्ता एगे वए दसगोसाहस्सिएणं वएण जाव समणं भगवं

महावीरं वंदइ नमंसइ वंदित्ता नमंसित्ता जेणेव पोलासपुरे नयरे तेणेव उवागच्छइ उवागच्छित्ता पोलासपुरं नयरं मज्झंमज्झेणं जेणेव सए गिहे जेणेव अग्गिमित्ता भारिया तेणेव उवागच्छइ उवागच्छित्ता अग्गिमित्तं भारियं एवं वयासी-

एवं खलु देवाणुप्पियए! समणे भगवं महावीरे समोसढे तं गच्छाहि णं तुमं समणं भगवं महावीरं जाव पज्जुवासाहि समणस्स भगवओ महावीरस्स अंतिए पंचाणुव्वइयं सत्तसिक्खावइयं-दुवलसविहं गिहिधम्मं पडिवज्जाहि, तए णं सा अग्गिमित्ता भारिया सद्दालपुत्तस्स समणोवासगस्स तह त्ति एयमढं विणएणं पडिसुणेइ ।

तए णं से सद्दालपुत्ते समणोवासए कोडुंबियपुरिसे सद्दावेइ सद्दावेत्ता एवं वयासी- खिप्पामेव भो देवणुप्पिया! लहुकरणजुत्त-जोइयं समखुर-वालिहाण -समलिहियसिंगएहिं जंबूणयामयकलावजुत्त-पइविसिअट्टएहिं रययामयघंटसुत्तरज्जुगवर-कंचण-खचिय-नत्थपग्गहोग्गहियएहिं नीलुप्पलकयामेलएहिं पवरगोणजुवाणएहिं नाणामणिकणग-घंटियाजाल-परि-गयं सुजायजुगजुत्त उज्जुग-पसत्थसुविरइय-निम्मियं पवरलक्खणोववेयं जुत्तामेव धम्मियं जाणप्पवरं उव-इवेह उवढेत्ता मम एयमाणत्तियं पच्चप्पिणह ।

तए णं ते कोडुंबियपुरिसा जाव पच्चप्पिणंति ।

तए णं सा अग्गिमित्ता भारिया ण्हाया जाव पायच्छित्ता सुद्धप्पावेसाइं जाव अप्पमहग्गधाभर-णालंकियसरीरा चेडियाचक्कवालपरिकिण्णा धम्मियं जाणप्पवरं दुरुहइ दुरुहित्ता पोलासपुरं नयरं मज्झंमज्झेणं निग्गच्छइ निग्गच्छित्ता जेणेव सहस्संबवणे उज्जाणे तेणेव उवागच्छइ उवागच्छित्ता धम्मियाओ अज्झयणं-७

जाणप्पवराओ पच्चोरुहइ पच्चोरुहित्ता चेडियाचक्कवालपरिकिण्णा जेणेव समणे भगवं महावीरे तेणेव उवागच्छइ उवागच्छित्ता तिक्खुत्तो जाव वंदइ नमंसइ वंदित्ता नमंसित्ता नच्चासण्णे नाइदूरे जाव पंजलिउडा ठिइया चेव पज्जुवासइ ।

तए णं समणे भगवं महावीरे अग्गमित्ताए तीसे य जाव धम्मं परिकहेइ, तए णं सा अग्गिमित्ता भारिया समणस्स भगवओ महावीरस्स अंतिए धम्मं सोच्चा निसम्मं हट्टतुट्ठ जाव समणं भगवं महावीरं वंदइ नमंसइ वंदित्ता नमंसित्ता एवं वयासी- सद्दहामि णं भंते! निग्गंथं पावयणं जाव से जहेयं तुब्भे वदह, जहा- णं देवाणुप्पियाणं अंतिए बहवे उग्गा भोगा जाव पव्वइया नो खलु अहं तहा संचाएमि देवाणुप्पियाणं अंतिए मुंडा भवित्ता जाव अहं णं देवाणुप्पियाणं अंतिए पंचाणुव्वइयं सत्तसिक्खावइयं-दुवालसविहं गिहिधम्मं पडिवज्जिस्सामि, अहासुहं देवाणुप्पिया! मा पडिबंधं करेहि ।

तए णं सा अग्गिमित्ता भारिया समणस्स भगवओ महावीरस्स अंतिए पंचाणुव्वइयं सत्तसिक्खावइयं-दुवालसविहं गिहिधम्मं पडिवज्जइ पडिवज्जित्ता समणं भगवं महावीरं वंदइ नमंसइ वंदित्ता नमंसित्ता तमेव धम्मियं जाणप्पवरं दुरुहइ दुरुहित्ता जामेव दिसं पाउब्भूया तामेव दिसं पडिगया ।

तए णं समणे भगवं महावीरे अण्णदा कदाइ पोलासपुराओ नगराओ सहस्संबवणाओ उज्जाणाओ पडिणिक्खमइ पडिणिक्खमित्ता बहिया जणवयविहारं विहरइ ।

[४६] तए णं से सद्दालपुत्ते समणोवासए जाए- अभिगयजीवाजीवे जाव विहरइ ।

तए णं से गोसाले मंखलिपुत्ते इमीसे कहाए लद्धे समाणे-एवं खलु सद्दालपुत्ते आजीवियसमयं वमित्ता समणाणं निग्गंथाणं दिट्ठिं पडिवण्णे, तं गच्छामि णं सद्दालपुत्त आजीविओवासयं समणाणं निग्गंथाणं दिट्ठिं वामेत्ता पुणरवि आजिवियदिट्ठिं गेण्हावित्तए त्ति कट्ठु-एवं संपेहेइ संपेहेत्ता आजीवियसंघपरिवुडे जेणेव पोलासपुरे नयरे जेणेव आजिवियसभा तेणेव उइवागच्छइ उवागच्छित्ता भंडगनिकखेवं करेइ करेत्ता कतिवएहिं आजिविएहिं सद्धिं जेणेव सद्दालपुत्ते समणोवासए तेणेव उवागच्छइ ।

तए णं से सद्दालपुत्ते समणोवासए गोसालं मंखलिपुत्तं एज्जमाणां पासइ पासित्ता नो आढाति नो परिजाणति अणाढायमाणे अपरिजाणमाणे तुसिणीए संचिद्धइ तए णं से गोसाले मंखलिपुत्ते सद्दालपुत्तेणं समणोवासएणं अणाढिज्जमाणे अपरिजाणिज्जमाणे पीढ-फलग-सेज्जा-संथारद्वयाए समणस्स भगवओ महावीरस्स गुणकित्तणं करेमाणे सद्दालपुत्तं समणोवासयं एवं वयासी- आगए णं देवाणुप्पिया! इहं महामाहणे?

तए णं से सद्दालपुत्ते समणोवासए गोसालं मंखलिपुत्तं एवं वयासी- के णं देवाणुप्पिया! महामाहणे?

तए णं से गोसाले मंखलिपुत्ते सद्दालपुत्तं समणोवासयं एवं वयासी- समणे भगवं महावीरे महामाहणे,

से केणद्वेणं देवाणुप्पिया! एवं वुच्चइ-समणे भगवं महावीरे महामाहणे एवं खलु सद्दालपुत्ता समणे भगवं महावीरे महामाहणे उप्पन्ननाणदंसणधरे जाव महिय-पूइए जाव तच्च-कम्मसंपया-संपउत्ते, से तेणद्वेणं देवाणुप्पिया! एवं वुच्चइ-समणे भगवं महावीरे महामाहणे ।

आगए णं देवाणुप्पिया! इहं महागोवे? के णं देवाणुप्पिया! महागोवे? समणे भगवं महावीरे महागोवे ।

अज्झयणं-७

से केणद्वेणं देवाणुप्पिया! जाव महागोवे? एवं खलु देवाणुप्पिया! समणे भगवं महावीरे संसाराडवीए बहवे जीवे नस्समाणे विणस्समाणे खज्जमाणे छिज्जमाणे भिज्जमाणे लुप्पमाणे विलुप्पमाणे धम्ममएणं दंडेणं सारक्खमाणे संगोवेमाणे निव्वाणमहावाडं साहत्थिं संपावेइ, से तेणद्वेणं सद्दालपुत्ता! एवं वुच्चइ-समणे भगवं महावीरे महागोवे ।

आगए णं देवाणुप्पिया! इहं महासत्थवाहे? के णं देवाणुप्पिया! महासत्थवाहे? सद्दालपुत्ता! समणे भगवं महावीरे महासत्थवाहे, से केणद्वेणं? एवं खलु देवाणुप्पिया! समणे भगवं महावीरे संसाराडवीए बहवे जीवे नस्समाणे विणस्समाणे जाव विलुप्पमाणे जाव घम्मपएणं पंथेणं सारक्खमाणे० निव्वाणमहापट्टणाभिमुहे साहत्थिं संपावेइ, से तेणद्वेणं सद्दालपुत्ता एवं वुच्चइ-समणे भगवं महावीरे महासत्थवाहे ।

आगए णं देवाणुप्पिया! इहं महाधम्मकही? के णं देवाणुप्पिया! महाधम्मकही? समणे भगवं महावीरे महाधम्मकही, से केणद्वेणं० समणे भगवं महावीरे महाधम्मकही? एवं खलु देवाणुप्पिया समणे भगवं महावीरे महइमहालयंसि संसारंसि बहवे जीवे नस्समाणे विणस्समाणे जाव उम्मगगपडिवण्णे सप्पहविणप्पणद्वे मिच्छत्तबलाभिमूए अट्ठविहकम्ममतमपडल-पडोच्छण्णे बहूहिं अट्ठेहि य जाव वागरणेहि य

चाउरंताओ संसाररकंताओ साहत्थिं नित्थारेइ से तेणट्ठेणं देवणुप्पिया एवं वुच्चइ-समणे भगवं महावीरे महाधम्मकही ।

आगए णं देवाणुप्पिया! इहं महानिज्जामए? के णं देवाणुप्पिया! महानिज्जामए? समणे भगवं महावीरे महानिज्जाम, से केणट्ठेणं? एवं खलु देवाणुप्पिया! समणे भगवं महावीरे संसारमहासमुद्वे बहवे जीवे नस्समाणे विणस्समाणे जाव विलुप्पमाणे बुडुमाणे निबुड्डमाणे उप्पियमाणे धम्ममईए नावाए निव्वाणतीराभिमुहे साहत्थिं संपावेइ, से तेणट्ठेणं देवाणुप्पिया! एवं वुच्चइ-समणे भगवं महावीरे महानिज्जामए ।

तए णं से सद्दालतपुत्ते समणोवासए गोसालं मंखलिपुत्तं एवं वयासी- तुब्भे णं देवाणुप्पिया! इयच्छेया इयपट्ठा इयनिउणा इयनयवादी इयउवएसलद्धा इयविण्णाणपत्ता, पभू णं तुब्भे मम धम्मायरिएणं धम्मोवएसएणं समणेणं भगवया महावीरेणं सद्धिं विवादं करेत्तए? नो इणट्ठे समट्ठे ।

से केणट्ठेणं देवाणुप्पिया! एवं वुच्चइ-नो खलु पभू तुब्भे मम धम्मायरिएणं जाव महावी-रेणं सद्धिं विवादं करेत्तए? सद्दालपुत्ता! से जहानामए केइ पुरिसे तरुणे जुगवं बलवं जाव निउणसिप्पोवगए एगं महं अयं वा एलयं वा सूयरं वा कुकुडं वा तित्तरं वा वट्ठयं वा लायवं वा कवोयं वा कविंजलं वा वायसं वा सेणयं वा हत्थंसि वा पायंसि वा खुरंसि वा पुच्छंसि वा पिच्छंसि वा सिंगंसि वा विसाणंसि वा रोमंसि वा जहिंजहिं गिण्हइ तहिं-तहिं निच्चलं निप्फंदं धरेइ, एवामेव समणे भगवं महावीरे ममं बहूहिं अट्ठेहि य हेऊहि य जाव वागरणेहि य जहिं-जहिं गिण्हइ तहिं-तहिं निप्पट्ठ-पसिण-वागरणं करेइ, से तेणट्ठेणं सद्दालपुत्ता एवं वुच्चइ-नो खलु पभू अहं तव धम्मायरिएणं जाव महावीरेणं सद्धिं विवादं करेत्तए।

तए णं से सद्दालपुत्ते समणोवासए गोसालं मंखलिपुत्तं एवं वयासी- जम्हा णं देवाणुप्पिया तुब्भे मम धम्मायरिस्स जाव महावीरस्स संतेहिं तच्चेहिं सब्भूएहिं भावेहिं गुणकित्तणं करेह तम्हा णं अहं तुब्भे पाडिहारिएणं पीढ-फलग-सेज्जा-संधारएणं उवनिमंतेति, नो चेव णं धम्मो त्ति वा तवो त्ति वा, तं गच्छह णं तुब्भे मम कुंभारावणेसु पाडिहारियं पीढ-फलग-जाव ओगिणिहता णं विहरइ ।

अज्झयणं-७

तए णं से गोसाले मंखलिपुत्ते सद्दालपुत्तस्स समणोवासयस्स एयमट्ठं पडिसुणेइ पडिसुणेत्ता कुंभारावणेसु पाडिहारियं पीढ-जाव ओगिणिहता णं विहरइ ।

तए णं से गोसाले मंखलिपुत्ते सद्दालपुत्तं समणोवासयं जाहे नो संचाएइ बहूहिं आघवणाहि य पन्नवणाहि य सण्णवणाहि य विण्णवणाहि य निग्गंथाओ पावयणाओ चालित्तए वा खोभित्तए वा विपरिणामेत्तए वा ताहे संते तंते परितंते पोलासपुराओ नयरा पडिणिक्खमइ पडिणिक्खमित्ता बहिया जणवयविहारं विहरइ ।

[४७] तए णं तस्स सद्दालपुत्तस्स समणोवासयस्स बहूहिं सीलं जाव भावेमाणस्स चोद्धस संवच्छरा वीइक्कंता पन्नरसमस्स संवच्छरस्स अंतरा वट्ठमाणस्स पुव्वरत्तावरत्तकाले जाव पोसहसालाए० समणस्स भगवओ महावीरस्स अंतियं धम्मपन्नत्ति उवसंपज्जित्ता णं विहरइ ।

तए णं तस्स सद्दालपुत्तस्स समणोवासयस्स पुव्वरत्तावरत्तकाले एगे देवे अंतियं पाउब्भवित्था।

तए णं से देवे एगं महं नीलुप्पल-जाव [गवलगुलिय-अयसिकुसुमप्पगासं खुरधारं असिं गहाय सद्दालपुत्तं समणोवासयं एवं वयासी- जहा चुलणी-पियस्स तहेव देवो उवसग्गं करेइ, नवरं एक्केक्के

पुत्ते नव मंससोल्लए करेइ जाव कणीयसं घाएइ घाएत्ता जाव आयंचइ, तए णं सद्दालपुत्ते समणो वासए अभीए जाव विहरइ ।

तए णं से देवे सद्दालपुत्तं समणोवासयं अभीयं जाव पासइ पासित्ता चउत्थं पि सद्दालपुत्तं समणोवासयं एवं वयासी- हं भो सद्दालपुत्ता समणोवासया अपत्थियपत्थिया० जाव न भंजेसि तओ ते जा इमा अग्गिमित्ता भारिया धम्मसहायइ धम्मविइज्जिया धम्माणुरागरत्ता समसुहदुक्खसहायइया तं साओ गिहाओ नीणेमि नीणेत्ता तव अग्गओ घाएमि घाएत्ता नव मंसलोल्लए करेमि करेत्ता आदाणभरियंसि कडा-हयंसि अद्दहेमि अद्दहेत्ता तव गायं मंसेण य सोणिण्ण य आयंचामि, जहा- णं तुमं अट्ट-दुहट्ट ववरोविज्जसि,

तए णं से सद्दालपुत्ते समणोवासए तेणं देवेणं एवं वुत्ते समणे अभीए जाव विहरइ ।

तए णं तस्स सद्दालपुत्तस्स समणोवासयस्स तेणं देवेणं दोच्चं पि तच्चं पि एवं वुत्तस्स समाणस्स अयं अज्झत्थिए चिंतिए पत्थिए मणोगए संकप्पे समुप्पज्जित्था-एवं जहा चुलणीपिया तहेव चितेइ जे णं ममं जेहं पुत्तं जे णं ममं मज्झिमं पुत्तं जेणं ममं कणीयसं पुत्तं जाव आइंचइ जाव वि य णं ममं इमा अग्गिमित्ता भारिया० समसुहदुक्खसहाइया तं पि य इच्छइ साओ गिहाओ नीणेत्ता ममं अग्गओ घाएत्तए तं सेयं खलु ममं एयं पुरिसं गिण्हित्तए त्ति कट्टु उद्धाविए जहा चुलणीपिया तहेव सव्वं भाणियव्वं नवरं अग्गिमित्ता भारिया कोलाहलं सुणित्ता भणइ, सेसं जहा चुलणीपिया वत्तव्वया नवरं अरुणभूए विमाणे उववन्ने जाव महाविदेहे वासे सिज्झिहिइ, निक्खेवओ०

० सत्तमं अज्झयणं समत्तं ०

० मुनि दीपरत्नसागरेण संशोधितः सम्पादित्तश्च सत्तमं अज्झयणं समत्तं ०

[[अट्ठमं अज्झयणं-महासतए]]

[४८] अट्ठमस्स उक्खेवओ०

अज्झयणं-८

एवं खलु जंबू! तेणं कालेणं तेणं समएणं रायगिहे नयरे गुणसिलए चेइए, सेणिए राया, तत्थ णं रायगिहे नयरे महासतए नामं गाहावई परिवसइ, अड्ढे जहा आणंदो नवरं अट्ठ हिरण्णकोडीओ सकंसाओ निहाणपउत्ताओ अट्ठ हिरण्णकोडीओ सकंसाओ वुड्ढिउत्ताओ अट्ठ हिरण्णकोडीओ सकंसाओ पवित्थरपउत्ताओ अट्ठ वया दसगोसाहस्सिएणं वएणं, से णं

तस्स णं महासतयस्स रेवतीए भारियाए कोलहरियाओ अट्ठ हिरण्णकोडीओ अट्ठ वया दसगोसाहस्सिएण वएणं होत्था अवसेसाणं दुवालसण्हं भारियाणं कोलहरिया एगमेगा हिरण्णकोडी एगमेगे य वए दसगोसाहस्सिएणं वएणं होत्था ।

[४९] तेणं कालेणं तेणं समएणं सामी समोसढे, परिसा निग्गया, जहा आणंदो तहा निग्ग-च्छइ तहेव सावय धम्मंपडिवज्जइ, नवरं-अट्ठ हिरण्णकोडीओ सकंसाओ, अट्ठ वया रेवतीपामोक्खा-हितेरसहिं भारियाहिं अवसेसं मेहुणविहिं पच्चक्खाइ, सेसं सव्वं तहेव । इमं च णं एयारूवं अभिग्गहं अभिगेण्हति-कल्लाकल्लिं च णं कप्पइ मे बेदोणियाए कंसपाईए हिरण्णभरियाए संववहरित्तए ।

तए णं से महासतए समणोवासए जाए अभिगय जीवाजीवे जाव विहरइ ।

तए णं समणे भगवं महावीरे बहिया जणवय-विहारंविहरइ ।

[५०] तए णं तीसे रेवतीए गाहावइणीए अण्णदा कदाइ पुव्वरत्तावरत्तकालसमयंसि कुडुंब जागरियं जागरमाणीए इमेयारूवे अज्झत्थिए चिंतिए पत्थिए मणोगए संकप्पे समुप्पज्जित्था-एवं खलु अहं इमासिं दुवालसण्हं सपत्तीणं विघातेणं नो संचाएमि महासतएणं समणोवासएणं सद्धिं ओरालाइं माणुस्सयाइं भोगभोगाइं भुंजमाणी विहरित्तए, तैं सेयं खलु ममं एयाओ दुवालस वि सवत्तीयाओ अग्गिपओगेणं वा सत्थप्पओगेणं वा विसप्पओगेणं वा जीवियाओ ववरोवित्ता एतासिं एगमेगं हिरण्णकोडिं एगमेगं वयं सयमेव उवसंपज्जित्ताणं महासतएणं समणोवासएणं सद्धिं ओरालाइं जाव विहरित्तए ।

एवं संपेहेइ संपेहेत्ता तासिं दुवालसण्हं सवत्तीणं अंतराणि य छिद्वाणि य विवराणि य पडिजागर- माणी-पडिजागरमाणी विहरइ ।

तए णं सा रेवती गाहावइणी अण्णदा कदाइ तासिं दुवालसण्हं सवत्तीणं अंतरं जाणित्ता छ सवत्तीओ सत्थप्पओगेणं उद्वेइ, छ सवत्तीओ विसप्पओगेणं उद्वेइ, उद्वेत्ता तासिं दुवालसण्हं सवत्तीणं कोलघरियं एगमेगं हिरण्णकोडिं एगमेगं वयं सयमेव पडिवज्जित्ता महासतएणं समणोवासएणं सद्धिं ओरालाइं माणुस्सयाइं भोगभोगाइं भुंजमाणी विहरइ ।

तए णं सा रेवती गाहावइणी मंसलोलुया मंसमुच्छिया जाव अज्झोववण्णा बहुविहेहिं मंसेहिं सोल्लेहिं य तलिएहि य भज्झिएहि य सुरं च महुं च मेरगं च मज्जं च सीधुं च पसण्णं च आसाएमाणी विसाएमाणी परिभाएमाणी परिभुंजेमाणी विहरइ ।

[५१] तए णं रायिगहे नयरे अण्णदा कदाइ अमाघाए घुढे यावि होत्था, तए णं सा रेवती गाहावइणी मंसलोलुया मंसमुच्छिया० कोलघरिए पुरिसे सद्दावेइ सद्दावेत्ता एवं वयासी-तुब्भे देवाणुप्पिया! ममं कोलहरिएहिंतो वएहिंतो कल्लाकल्लिं दुवे दुवे गोणपोयए उद्वेह उद्वेत्ता ममं उवणेह ।

तए णं ते कोलघरिया पुरिसा रेवतीए गाहावइणीए तह त्ति एयमद्वं विणएणं पडिसुणंति पडिसुणित्ता रेवतीए गाहावइणीए कोलहरिएहिंतो वएहिंतो कल्लाकल्लिं दुवे-दुव गोणपोयए वहेंति वहेत्ता रेवतीए गाहावइणीए उवणेंति ।

अज्झयणं-८

तए णं सा रेवती गाहावइणी तेहिं गोणमंसेहिं सोल्लेहि य० सुरं च० आसाएमाणी० विहरइ ।

[५२] तए णं तस्स महासतगस्स समणोवासगस्स बहूहिं सील जाव भावेमाणस्स चोदस्स संवच्छरा वीइककंता एवं तहेव जेडुंपुत्तं ठवेइ जाव पोसहसालाए धम्मपन्नत्तिं उवसंपज्जित्ता णं विहरइ ।

तए णं सा रेवती गाहावइणी मत्ता-लुलिया विइण्ण-केसी उत्तरिज्जयं विकड्ढमाणी-विड्ढ-माणी जेणेव पोसहसाला जेणेव महासतए समणोवासए तेणेव उवागच्छइ उवागच्छित्ता मोहुम्मायजणणाइं सिंगारियाइं इत्थिभावाइं उवदंसेमाणी-उवदंसेमाणी महासतयं समणोवासयं एवं वयासी-

हं भो महासतया समणोवासया! धम्मकामया पुन्नकामया सग्गकामया मोक्खकामया धम्मकंखिया जाव मोक्खकंखिया धम्मपिवासिया जाव मोक्खपिवासिया किं णं तुब्भं देवाणुप्पिया धम्मणेणं वा पुन्नेण वा सग्गेण वा मोक्खेण वा? जं णं तुमं मए सद्धिं ओरालाइं माणुस्सयाइं भोगभोगाइं भुंजमाणे नो विहरसि ।

तए णं से महासतए समणोवासए रेवतीए गाहावइणीए एयद्वं नो आढाइ नो परियाणाइ अणाढायमाणे अपरियाणमाणे तुसिणीए धम्मज्झाणोवगए विहरइ ।

तए णं सा रेवती गाहावइणी महासतयं समणोवासयं दोच्चं पि तच्चं पि एवं वयासी- हं भो तं चेव भणइ सोऽवि तहेव जाव अणाढायमाणे अपरियाणमाणे विहरइ ।

ते णं सा रेवती गाहावइणी महासतएणं समणोवासएणं अणाढाइज्जमाणी अपरियाणिज्जमाणी जामेव दिसं पाउब्भूया तामेव दिसं पडिगया ।

[५३] तए णं से महासतए समणोवासए पढमं उवासगपडिमं उवसंपज्जित्ता णं विहरइ पढमं अहासुत्तं जाव एक्कारस वि, ते णं से महासतए समणोवासए तेणं ओरालेणं जाव किसे घमणिसंतए जाए, तए णं तस्स महासतगस्स समोवासयगस्स अण्णदा कदाइ पुव्वरत्तावरत्तकाले धम्मजागरियं जागरमाणस्स अयं अज्झत्थिए० समुप्पज्जित्था, एवं खलु अहं इमेणं ओरालेणं जहा आणंदो तहेव अपच्छिम-मारणंतियसंलेहणा-झूसणा झूसिए भत्तपाण-पडियाइक्खिए कालं अणवकंखमाणे विहरइ ।

तए णं तस्स महासतगस्स समणोवासगस्स सुभेणं अज्झवसाणेणं जाव खओवसमेणं ओहिणाणे समुप्पण्णे पुरत्थिमे णं लवणसमुद्धे जोयणसाहस्सियं खेत्तं जाणइ पासइ, दक्खिणे णं० पच्चत्थिमे णं० उत्तरे णं जाव चुल्लहिमवतं वासहरपव्वयं जाणइ पासइ, उड्ढं जाव सोहम्मं कप्पं जाणइ पासइ, अहे इमीसे रयणप्पभाए पुढवीए लोलुयच्चुयं नरयं चउरासीइवाससहस्सट्ठिइयं जाणइ पासइ ।

[५४] तए णं सा रेवती गाहावइणी अन्नदा कदाइ मत्ता जाव उत्तरिज्जयं विकड्ढमाणी-विकड्ढमाणी जेणेव पोसहसाला जेणेव महासतए समणोवासए तेणेव उवागच्छइ उवागच्छित्ता महासतयं तहेव भणइ जाव दोच्चंपि तच्चंपि एवं वयासी- हं भो! तहेव,

तए णं से महासतए समणोवासए रेवतीए गाहावइणीए दोच्चं पि तच्चं पि एवं वुत्ते समाणे आसुरत्ते रुद्धे कुविए चंडिक्खिए मिसिमिसीयमाणे ओहिं पउंजइ पउंजित्ता ओहिणा आभोएइ ओभाएत्ता रेवत्तिं गाहावइणिं एवं वयासी-हं भो रेवती! अप्पत्थियपत्थिए० जाव एवं खलु तुमं अंतो सत्तरत्तस्स अलसएणं बाहिणा अभिभूया समाणी अट्ठ-दुहट्ठ-वसट्ठा असमाहिपत्ता कालमासे कालं किच्चा अहे इमीसे रयणप्पभाए पुढवीए लोलुयच्चुए नरए चउरासीतिवाससहस्सट्ठिइएसु नेरइएसु नेरइयत्ताए उववज्जिहिंसी ।

तए णं सा रेवती गाहावइणी महासतएणं समणोवासएणं एवं वुत्ता समाणी- रुद्धे णं ममं अज्झयणं-८

महासतए समणोवासए हीणे णं ममं महासतए समणोवासए अवज्झाया णं अहं महासतएणं समणोवासएणं न नज्जइ णं अहं केणवि कुमारेणं मारिज्जिस्सामि-त्ति कट्ठु भीया तत्था तसिया उव्विग्गा संजायभया सणियं-सणियं पच्चोसक्कइ पच्चोसक्कित्ता जेणेव सए गिहे तेणेव उवागच्छइ उवागच्छित्ता ओहयमण-संकप्पा जाव झियाइ ।

तए णं सा रेवती गाहावइणी अंतो सत्तरत्तस्स अलसएणं वाहिणा अभिभूया अट्ठ-दुहट्ठ-वसट्ठा कालमासे कालं किच्चा इमीसे रयणप्पभाए पुढवीए लोलुयच्चुए नरए चउरासीतिवाससहस्सट्ठिइ-यएसु नेरइएसु नेरइयत्ताए उववन्ना ।

[५५] तेणं कालेणं तेणं समएणं समणे भगवं महावीरे समोसरिए जाव परिसा पडिगया, गोयमाइ समणे भगवं महावीरे भगवं गोयमं एवं वयासी- एवं खलु गोयमा! इहेव रायगिहे नयरे ममं अंतेवासी महासतए नामं समणोवासए पोसहसाला अपच्छिममारणंतियसंलेहणाए झूसियसरीरे भत्तपाण-पडियाइक्खिए कालं अणवकंखमाणे विहरइ ।

तए णं तस्स महासतगस्स रेवती गाहावइणी मत्ता जाव विकड्ढमाणी-विकड्ढमाणी जेणेव पोसहसाला जेणेव महासतए तेणेव उवागच्छइ उवागच्छित्ता मोहुम्माय जाव एवं वयासी- तहेव जाव दोच्चं पि तच्चं पि एवं वयासी, तए णं से महासतए समणोवासए रेवतीए गाहावइणीए दोच्चं पि तच्चं पि एवं वुत्ते समाणे आसुरत्ते० जाव ओहिं पउंजइ पउंजित्ता ओहिणा आभोएइ आभोएत्ता रेवत्तिं गाहावइणिं एवं वयासी-जाव उववज्जिहिसि, नो खलु कप्पइ गोयमा! समणोवासगस्स अपच्छिमं जाव झूसियस्स सरीरस्स भत्तपाण-पडियाइक्खियस्स परो संतेहिं तच्चेहिं तहिएहिं सब्भूएहिं अणिट्ठेहिं अकंतेहिं अप्पिएहिं अमणुण्णेहिं अमणामेहिं वागरणेहिं वागरित्तए, तं गच्छ णं देवाणुप्पिया! तुमं महासतयं समणोवासयं एवं वयाहि--।

नो खलु देवाणुप्पिया कप्पइ समणोवासगस्स अपच्छिम जाव भत्तपाण-पडियाइक्खियस्स परो संतेहि जाव वागरित्तए, तुमे य णं देवाणुप्पिया! रेवती गाहावइणी संतेहिं० अणिट्ठेहिं० वागरणेहिं वागरिया, तं णं तुमं एयस्स ठाणस्स आलोएहि जाव अहारिहं पायच्छित्तं तवोकम्मं पडिवज्जाहि ।

तए ण से भगवं गोयमे समणस्स भगवओ महावीरस्स तह त्ति एयमट्ठं विणएणं पडिसु-णेइ पडिसुणेत्ता तओ पडिणिक्खमइ पडिणिक्खमित्ता रायगिहं नयरं मज्झमज्झेणं अनुप्पविसइ अनुप्प-विसित्ता जेणेव महासतगस्स समणोवासगस्स गिहे जेणेव महासतए समणोवासए तेणेव उवागच्छइ ।

तए णं से महासतए समणोवासए भगवं गोयमं एज्जमाणे पासइ पासित्ता हट्ठ जाव हियए भगवं गोयमं वंदइ नमंसइ तए णं से भगवं गोयमे महासतयं समणोवासयं एवं वयासी- एवं खलु देवाणुप्पिया! समणे भगवं महावीरे एवं आइक्खइ भासइ पन्नवेइ परूवेइ-नो खलु कप्पइ देवाणुप्पिया समणोवासगस्स अपच्छिम जाव वागरित्तए, तुमे णं देवाणुप्पिया! रेवती गाहावइणी सेतंहिं जाव वागरिया, तं णं तुमं देवाणुप्पिया! एयस्स ठाणस्स आलोएहिं जाव पडिवज्जाहि ।

तए णं से महासत्तए समणोवासए भगवओ गोयमस्स तह त्ति एयमट्ठं विणएणं पडिसुणेइ पडिसुणेत्ता तस्स ठाणस्स आलोएइ जाव अहारिहं पायच्छित्तं तवोकम्मं पडिवज्जइ ।

तए णं से भगवं गोयमे महासतगस्स समणोवासगस्स अंतियाओ पडिणिक्खमइ पडिणि-क्खमित्ता रायगिहं नयरं मज्झमज्झेणं निग्गच्छइ निग्गच्छित्ता जेणेव समणे भगवं महावीरे तेणेव उवा-अज्झयणं-८

गच्छइ उवागच्छित्ता समणं भगवं महावीरं वंदइ नमंसइ वंदित्ता नमंसित्ता संजमेणं तवसा अप्पाणं भावेमाणे विहरइ ।

तए णं समणे भगवं महावीरे अण्णदा कदाइ रायगिहाओ नयराओ पडिणिक्खमइ पडिणि-क्खमित्ता बहिया जणवयविहारंविहरइ ।

[५६] तए णं से महासतए समणोवासए बहूहिं सील-व्वय-जाव भावेत्ता वीसं वासाइं समणोवासगपरियायं पाउणित्ता एक्कारस य उवासगपडिमाओ सम्मं काएणं फासित्ता मासियाए संलेहणाए अप्पाणं झूसित्ता सट्ठिं भत्ताइं अणसणाए छेदेत्ता आलोइय-पडिककंते समाहिपत्ते कालमासे कालं किच्चा सोहम्मं कप्पे अरुणवडैसए विमाणे देवत्तए उववण्णो, चत्तारि पलिओवमाइं ठिई पन्नत्ता । महाविदेहे वासे सिज्झिहिइ० निक्खेवो ।

◦ अट्ठमं अज्झयणं समत्तं ◦

◦ मुनि दीपरत्नसागरेण संशोधितः सम्पादित्तश्च अङ्गमं अज्झयणं समत्तं ◦

[[नवमं अज्झयणं-नंदिणीपिया]]

[५७] नवमस्स उक्खेवो◦

एवं खलु जंबू! तेणं कालेणं तेणं समएणं सावत्थी नयरी, कोट्टए चेइए, जियसत्तू राया, तत्थ णं सावत्थीए नयरीए नंदिणीपिया नामं गाहावई परिवसइ-अइडे◦, चत्तारि हिरण्णकोडीओ निहाण-पउत्ताओ, चत्तारि हिरण्णकोडीओ वुइढिपुत्ताओ, चत्तारि हिरण्ण-कोडीओ पवित्थरपउत्ताओ, चत्तारि वया दसगोसाहस्सिएणं वएणं, अस्सिणी भारिया, सामी समोसडे जहा आनंदो तहेव गिहिधम्मं पडिवज्जइ, सामी बहिया विहरइ ।

तए णं से नंदिणीपिया समणोवासए जाए जाव विहरइ तए णं तस्स नंदिणी-पियस्स समणोवासगस्स बहूहिं सील-व्वय-गुण जाव भावेमाणस्स चोद्वस संवच्छराइं वीइक्कंताइं तहेव जेढुं पुत्तं ठवेइ, धम्मपन्नत्तिं, वीसं वासाइं परियागं, नाणत्त, अरुणगवे विमाणे उववाओ, महाविदेहे वासे सिज्झिहिइ ।

◦ नवमं अज्झयणं समत्तं ◦

◦ मुनि दीपरत्नसागरेण संशोधितः सम्पादित्तश्च नवमं अज्झयणं समत्तं ◦

[[दसमं अज्झयणं-लेइयापिता]]

[५८] दसमस्स उक्खेवो,

एवं खलु जंबू! तेणं कालेणं तेणं समएणं सावत्थीए नयरीए, कोट्टए चेइए, जियसत्तू राया, तत्थ णं सावत्थीए नयरीए लेइयापिता नामं गाहावई परिवसइ- अइडे◦, चत्तारि हिरण्णकोडीओ निहाणपउत्ताओ चत्तारि हिरण्णकोडीओ वुइढिपउत्ताओ चत्तारि हिरण्णकोडीओ पवित्थरपउत्ताओ चत्तारि वया दसगोसाहस्सिएणं वएणं होत्था । फग्गुणी नामं भारिया◦,

सामी समोसडे जहा आणंदो तहेव गिहिधम्मं पडिवज्जइ, जहा कामदेवो तहा जेढुं पुत्तं ठवेत्ता पोसहसालाए समणस्स भगवओ महावीरस्स धम्मपन्नत्तिं उवसंपजित्ताणं विहरइ, अज्झयणं-१०

नवरं निरुवसग्गाओ, एक्कारसवि उवासगपडिमाओ तहेव भाणियव्वाओ, एवं कामदेवगमेणं नेयव्वं जाव सोहम्मं कप्पे अरुणकीले विमाणे देवत्ताए उववन्ने ।

चत्तारि पलिओवमाइं ठिई,
महाविदेहे वासे सिज्झिहिइ ।

[५९] दसण्ह वि पन्नरसमे संवच्छरे वट्टमाणे णं चिंतता ।

दसण्ह वि वीसं वासाइं समणोवासयपरियाओ ।

एवं खलु जंबू समणेणं भगवया महावीरेणं◦ उवासगदसाणं दसमस्स अज्झयणस्स अयमट्ठे पन्नत्ते ।

एवं खलु जंबू! समणेणं भगवया महावीरेणं सत्तमस्स अंगस्स उवासगदसाण अयमट्ठे पन्नत्ते ।

[६०] उवासगदसाणं सत्तमस्स अंगस्स एगो सुयखंधो दस अज्झयणा एक्कसरगा दससु
चेव दिवसेसु उद्दिस्संति तओ सुयखंधो समुद्दिस्सइ तओ सुयखंधो अनुण्णविज्जइ दोसु दिवसेसु अंगं तहेव।

- [६१] वाणियगामे चंपा दुवे य वाणारसीए नयरीए ।
आलभिया य पुरवरी कंपिल्लपुरं च बोद्धव्वं ॥
- [६२] पोलासं रायगिहं सावत्थीए पुरीए दोन्नि भवे ।
एए उवासगाणं नयरा खलु होंति बोद्धव्वा ॥
- [६३] सिवनन्द-भद्द-सामा धन्न-बहुला-पूस-अग्गिमित्ता य ।
रेवइ-अस्सिणि तह फग्गुणी य भज्जाण नामाइं ॥
- [६४] ओहिन्नाण-पिसाए माया वाहि-धण-उत्तरिज्जे य ।
भज्जा य सुव्वया दुव्वया निरुवसग्गाया दोन्नि ॥
- [६५] अरुणे अरुणाभे खलु अरुणप्पह-अरुणकंत-सिद्धे य ।
अरुणज्झए य छट्ठे भूय-वडिंसे गवे कीले ॥
- [६६] चाली सट्ठि असीई सट्ठी सट्ठी य सट्ठी दसहस्सा ।
असिइ चत्ता चत्ता वए वइयाण सहसाणं ॥
- [६७] बारस अट्ठारस चउवीसं तिविहं अट्ठारसाइ विन्नेयं ।
धन्नेण ति चोव्वीसं बारस बारस य कोडीओ ॥
- [६८] उल्लण दंतवणफले अब्भिङ्गणुवट्ठणे सिणाणेय ।
वत्थं विलेवण पुप्फे आमरणं धूव पेज्जाइ ॥
- [६९] भक्खोयण सूय घए सागे माहुर जेमणऽण्णपाणे य ।
तम्बोले इगवीसं आणन्दाईण अभिग्गहा ॥
- [७०] उड्ढं सोहम्म पुरे लोलुए अहे उत्तरे हिमवंते ।
पज्जसए तह तिदिसिं ओहिनाणं तु दसगस्स ॥
- [७१] दंसण वय सामाइय पोसहपडिमा अबम्म सच्चित्ते ।
आरंभ पेस उद्दिट्ठ वज्जए समणभूए य ॥
- [७२] इक्कारस पडिमाओ वीसं परियाओ अणसणं मासे ।
सोहम्मो चउपलिया महाविदेहम्मि सिज्झिहिइ ॥

◦ दसमं अज्झयणं समत्तं ◦

मुनि दीपरत्नसागरेण संशोधितः सम्पादितश्च दसमं अज्झयणं समत्तं

७

उवासगदसाओ-सत्तमं अंगसुत्तं

-----*

मुनि दीपरत्नसागरेण संशोधितः सम्पादितश्च उवासगदसाओ समत्तं

----*-----*